

EDI NDIKÒKIIBWA KAAYÌ

NÜNKU KU MUKUNÀ?



Itàbuujà nàka, itàbuujà nàka,
Bintu byònsò bidi mwà kwenzeka, itàbuujà
nàka.

Twìnyikàayi mitù yètù mpindyewu.

Taatù Nzambi, ke disambila dyètù dyà meeji matòòke dilòòlò edi ndyòdi adi, pa kumòna byònsò by'Ūdi wenza bwà bantu mu ditùkù edi. Nènku tudi tuKulòmba, Mukalenge, swàkukù bwà twitabuujè ànu cyanààna, twitabuujè ànu ne Cìdi Bulelèlà, Dìyì difùnda diikale dimwènèshìibwe kutùdi. Enzàku bintu ebi, Taatù.

² Mpindyewu dilòòlò edi tudi baswè kuKusàkidila bwà—bwà Bukènkè b'Ūdi mutwelèle pa Mifùndu mu dindà emu. Nènku tudi tulòmba dilòòlò edi, Mukalenge, mu mulongo wà babèèdi awu, bwà Wèwè kushindika Dìyì Dyèbè ne m'Bulelèlà.

³ Tudi tulòmba bwà èkèleeziyà yònsò ne masangisha ònsò bàdi badikùngwije banyùngùlùkile tu—tu—tubikòlokolo tùdi myaba mishiilèshìilàngàne, mu ditùnga dijimà, too ne ku Côte Ouest, too ne ku mikùnà yà ku Arizona, kupweka mu bibandabanda byà mu Texas mwàmwa, bibwele too ne mu Côte Est, mu ditùnga dijimà, Mukalenge, mùdìbo badìsangishè. Mèbà àbùngì mashiilàngàne, tudi mu cikondo, kàdi, Mukalenge, tudi bònsò pàmwè dilòòlò edi bu muntu umwe, beena kwitabuujà, bindile Dilwa dyà Maasiyà. Tudi tulòmba, Taatù wa mu Dyulu, bwà Wèwè kuMutùma àbìdi àdi panshi aa bwà Èkèleeziyà Webè. Bwalu tudi tulòmba nùnku mu Dìnà Dyèndè. Amen.

⁴ Swàyi nùsombè. Myoyi yà beena Kilistò kùdi aba bònsò bàdi kaaba aka dilòòlò edi. Ndi ndòmba luse bwà mutùcìdi ànu kacya twàlamakana ne bapàte bapàngè too ne mwà kupuuyakana. Nànsha mene bifidi byà mashika, nànsha mùdìku bifidi byà mashika, kabýèna ne bukole bwàbùngì to, bwà bùngì bwà bantu. Bu ne kùvwa ànu bantu bùngì bukùmbàne mu èkèleeziyà wa ciibidilu, bifidi byà mashika àbi's bìvwa bifwànyìne kunùùmisha ne mashika. Kàdi mpindyewu muntu yònsò ùdi ne dikàpakapà, dimwela lupeepèlè, kàdi cifidi cyà mashika cidi pàaci ànu munkaci mwà kutùma mashika ne mwàci mwònsò.

⁵ Tudi tutuma myoyi kuumukila ku Côte Est too ne ku Wesètè, kùdi balundà bèètù bònsò mu Kilistò, bàdi munkaci mwà kutèeleja abu. Tudi tutùma myoyi mu San Jose, Mwanèètù Borders, kasùmbù kàdi kuntwaku. Tudi tutùma myoyi ku mikùnà, mu Prescott, mu Arizona, kùdi Mwanèètù Leo Mercier

ne kasumbù kèndè kàdi kuntu kwàka munkaci mwà kwindila Dilwa dyà Mukalenge abu. Tudi tutùma myoyi kùdi aba bàdi mu Tucson, bàdi badisangishe dilòòlò edi abu, bindile Dilwa dyà Mukalenge. Mu Houston mwàmwa, mu Texas, kùdi aba bàdi bindile Dilwa dyà Mukalenge abu. Mu Chicago mwàmwa, kùdi aba bàdi bindile Dilwa dyà Mukalenge abu. Ku Côte Est, ku New York ne ku Connecticut, ne bisumbu binène bìdi kuntwaku abi, bàdi bindile Dilwa dyà Mukalenge abu. Katwèna ne mwaba apa wà kubàsòmbesha to, pa nàнку tudì ànu ne cyà kubàtùmina Dìyì ku—mùshindu wà ku tèlèfonè. Tudi tutùma myoyi kùdi Mwanèètù Junior Jackson dilòòlò edi, ne kasumbù kèndè mu Clarksville mwàmwa. Mwanèètù Ruddell, mu 62 mwàmwa, ne kasumbù kèndè, bindile Dilwa dyà Mukalenge. Nènku tudì badisangishe kaaba aka dilòòlò edi mu èkèleeziyà wa kumbèlu, tabernacle, bindile Dilwa dyà Mukalenge.

⁶ Nènku mpindyewu, bààbùngì bàà kunùdi pàmwàpa kabàvwa mu masangisha mu dindà emu to. Kàdi ndi mutwishìibwe ne bantu bònsò, bàvwa kabàyimù to, nebàpetè mukàbà wà mèyì awu, bwalu ndi ngiitabuujà ne ciwva m’Mukenji mutàmbe kwikala wà buludi menemene bwà èkèleeziyà kacya ku—ku Mukenji awu wà ne *Bakalenge, Tudi Dìbà Kaayi?* Mvwa muumvwa dilaabiibwa dyà Nyumà, kudyumvwa mulombòdiibwe bwà kwamba bìngàmbì abi. Ùvwa mule, kàdi nànsha nàнку mèmè mvwa mudyumvwa mulombòdiibwe bwà kucyènza. Ne ndi ngèèla meeji ne Mukalenge, ku Dìyì Dyèndè, mmuleejè ne mmu dìbà kaayi mutùdi ne mwoyi. Nènku nwikalaayi batwishìibwe ne tudì tuumvwa bintu bìdi kabìyi byumvrika bìdi munkaci mwà kwenzeka ebi. Nudi bamanyè’s, Bible mmwambè ne: “Beena lungènyi nebùmvwè.”

⁷ Kàdi matùnga ne bantu nebàtambè kushààla “bateketàngàne ne beena lungènyi lutàmbe.” Anji elàayi ànu meeji, ciibùngì cyà beena Àmèrikè bàdi ne mvùlà yà pankaci mpindyewu, bìipacila ku bidimu makùmi àbìdi, batàmba kuteketangana kàdi batàmba kwikala ne lungènyi. Kabàvwa ne ndèkè yà jet mu miinè matùkù awu to, ne—ne mìsilè yà bombe bwà mushindà ayi, kàdi bàvwa bàshààla ne twoyi ntàntà mule be. Tudi twenda tutàmba kuteketangana ne tutàmba kushààla beena lungènyi, ne lungènyi lwètù mene alu ke lwàtùbùtulà. Netùdibùtùle twètù biinè. Nzambi kààkutùbùtula to; lungènyi lwètù ndwàtùbùtùlà. Bitu misangu yònsò ànu mùshindù awu, ne ke mwikalàbi kàbìdi.

⁸ Mpindyewu, bu Mukalenge mwà kwanyisha, mu dindà dyà dyàlumingu dilwalwà edi, nciyi mumanyè mpindyewu cingùikalà mwà kwakulapù to, kàdi ndi mutwishìibwe ne Mukalenge, bu Yèyè mwà kutùlekela twètù ne mwoyi ne cintu nànsha cìmwè kaciyi cyènzeka to, ne cyòci ciikàle diswa Dyèndè, tudì ne kiipàcilà kàà kwamba dikwàbò Dìyiisha mu

dyàlumingu dilwalwà mu dindà, kusambidila babèèdi dilòòlò dyà dyàlumingu dilwalwà edi. Pashiishe cikondo cyànyì cyà kwalukila kwànyì ku Arizona necilwa, bwà kwaluja dikù ku nzùbu bwà bânà bà mòna mwà kudifùndisha mu kàlaasà. Dìbà adi nenwikalè... Netùnùmanyishè, ànu patùdi twenda tumanya pèètù apu, bwà masangisha pàdiwu àboba, anyì bikondo bitùdi... myaba yitùdi twipacila bwà kwikala. Pa nàнку, Nzambi ànùbènèshè bônso.

⁹ Mpindyewu dilòòlò edi, bu mùdìbi ne cidi... Ndi pashiishe ne tusunsa dikùmi ne tùtaanu, cyàkumpàla, tusunsa dikumi ne tùtaanu bwà dìbà mwandamukùlù kukùmbanadi mùnu mu Jeffersonville; nènku aci cidi tusunsa dikumi ne tùtaanu kumpàla kwà dìbà citèemà ku Côte Ouest, ne pashiishe tukàadi dìbà bu ìtaanu ku Côte Ouest. Pa nàнку mpindyewu tukàadi ànu bu dibwela dyà dìbà kaaba aka. Nènku ndi muswè kwakulakù neenù bwà kaadisangisha kàà cikòsò cyanàànà, bwà kuteeta kupeta dilaabiibwa dyà Nyumà, ne pashiishe kubìikila mulongo wà babèèdi.

¹⁰ Nènku ndi muswè bwà disangisha edi, ne disangisha didi didikungwije mu myaba mikwàbò, bàpetàku mulùme kampànda, mwanèètù wa balùme kampànda mulaabiibwe kùdi Nyumà; nènku patwàbangà kusambidila babèèdi, ndàayi nùkatentekelè aba bàdi mu disangisha dyènu abu byanza. Vùlukàayi ne, Nzambi ùdi myaba yônso; Yèyè ùdi myaba yônso. Pa nàнку, mu Texas mwàmwa, lwà mu Californie mwàmwa, lwà mu Arizona mwàmwa, mwaba wônso wùdi awu, tentekelaayi aba bàdi bàsaamà byanza patwàbangà kusambidila babèèdi. Ne ndi mutwishìibwe ne Nzambi neàtèèlejè ne neàndamunè disambila.

¹¹ Cintu cyà pawàci, dilòòlò dyà dyàlumingu dishàale edi, ne dilaabiibwa divwa munkaci mwà kutùngunuka, ne Nyumà Mwimpè... Cìvwa cintu menemene. Ncìvwa mwenzè mu—mulongo wà dijingulula to kùkaavwa ngondo ne ngondo, kacya ànu pàmvwà mwab'ewu cikondo kampànda aci. Ne pashiishe bwà kuya kuntwaku ànu ne mulayi... Kùyi mumanyè ne Yèyè neàcyènzè to. Kwèna mwà kwamba ne Yèyè neàcyènzè to. Bikèngela wèwè kubànda ànu kuntwaku ne kwindila. Yèyè mmudishikàmine. Yèyè ùdi wènta cidiYe muswè kwenza aci. Kàdi imana wèwè ànu mwaba awu mwindile bwà kumòna cyènzàYe, dìbà adi ùCyùmvwè cibwayika pambidi pèèbè mùshindù ewu.

¹² Nènku ku ndekeelu kwà—kwà disangisha, kùyi mumanyè ne ùvwa nganyì to, kàdi kùvwa mu—muntu kampànda mwaba kampànda mu mulongo uvwa muntu mule, ne dibàla, ne mwikàle ùsaama bikolè.

¹³ Ne pashiishe ànu ku ndekeelu menemene, kwakamweneka muntu kampànda pa cibumbà cyà ku cyambilu apa, ne ùvwa ne

mutù wèndè mwinyika, kàdi ùvwa ùmwèka bu uvwa usaama, mudikwàte lwà mu cifù emu. Ki mèmè kwela meeji ne awu ùvwa ne cyà kwikala muntu wa kumpàla awu anyi mwibìdì awu, anyi ne ndìbà kaayi divwàci dímvwà mumusambidile adi, bwalu ùvwa ne dibàla ne ùvwa mwinyike mutù wèndè panshi; muntu munène, ùvwa mukònàme. Kàdi mèmè kukènzakana e kupeta muntu mulùme mukàlàngà awu musòmbe mwaba awu, kàdi ùvwa ùcyònkomoka. Mèmè kudyàmbidila ne: “Bìdi penyì?” Ncìvwa mwà kwangata dipàngadika dyà mwaba ùvwàci to. Mvwa mwà kucyùmvwà ne kumòna muntu kumpàlà kwànyì.

Mèmè kucyùmvwà cìnyùnguluka luseke elu, ne cìvwa cyùmukila lwà paanyimà. Mèmè kutàngila Mwanèètù Neville ne bàbìdì bàdì basòmbe apa aba, kabàvwa bòbò to. Mèmè kwamba ne: “Muntu ùdi munda mwà ciinà cyà dibàtiiza paanyimà pààpa.” Kàdi nudi bamanyè ne ùvwa nganyì anyi? Mwanèètù Shepherd. Cìvwa cyenzè ne ncìvwa mwà kumujingulula, yèyè ùvwa musòmbe lwà paanyimà pààpa ne mutù wèndè mwinyika, ùsambila.

¹⁴ Uvwa wèla meeji ne ùvwa ne cyà kufwà, ùvwa mwele miine meeji awu mu mbingu mikesè mishàale eyi. Mukàjèndè kumwambilayè bwà kuyayè kasumba mukòlò mupyamùpyà wà bisàbaatà, ki yèyè ne: “Ncyàkwikala naabì dijinga to. Ncyàkwikala kaaba aka ntàntà bule nàнку to.”

¹⁵ Ki kutwilanganayè naanyi dìngà ditùkù mu...mu bulà mwàmwa, kwà Mwanèètù Wood, wèla mbilà ne ùtumbisha Nzambì. Yèyè kwamba ne: “Ndi ndya mabengù, mayi, tùmata, ne cintu kanà cyònsò cìndi muswè aci.”

¹⁶ Ne kudipwekesha kwònsò mwikàle ùfila nkwasà wèndè, wàlukila paanyimà muntwamu ùpàtuka mu njila, wènda ùsambila. Nwamònu’s, kabyèna bikukèngela kartà kàà disambila to, bìdi bikukèngela ànu diitabuuja nkàayadi. Nwamònu anyi?

Mpindyewu, ncìvwa mumanyè ne yèyè wàkondopiibwa anyi to, mèmè kwamba ànu ne: “Mu—muntu mulùme, ùsambila, yèyè ùdi ne cintu kampàndà cyà kaciyi cyènda bìmpè to.” Ngèèla meeji ne Wàkacitèèla ne: “Dìsaamà dyà cifù, ne mwikàle usambidila paanyimà apa. Mukalenge Yesù ùdi ùkusàngaja.” Mpindyewu, aci’s ke cyònsò cìmvwà mwà kwamba. Cìvwa cikòka ncyà ne yèyè ùvwa munkaci mwà kusambila. Mvwa mwà kucimòna, kàdi cidì cvènzeka ncyèna mucimanyè to. Nwamònu anyi?

¹⁷ Kàdi paùdì uCyùmvwà cyàlukila, bantu bònsò mbacyùmvwè, pàdìCi cyàmba ne: “EMU MMÛDÌ MUKALENGÈ WÀMBA,” nwamònu’s, awu kì m’mèmè udi wakula kàbìdì to; n’Yèyè.

¹⁸ Kàdi ntu misangu yònsò ànu ngàmba ne: “Yesù Kilistò wàkusàngaji,” aci’s m’Bulelèlè bwà menemene. “Wàkatàpiibwa

mpùtâ bwâ kushipa kwètù kwâ mikenji, ku mibùndàbùndâ Yèndè twâkondopiibwa.” Nwamònu anyi? Nwamònu anyi?

¹⁹ Kâdi pâlwalwâCi ne: “EMU MMÛDÌ MUKALENGE WÀMBA,” ne cikwambila cyâ dyanza ne cìikalâ mwâ kwenzeka, cìtangile bîmpè, necìikalè mùshindù awu.

²⁰ Kâdi pândi ngâmba ne: “Yesù Kilistò ùdi ùkwondopa ne ùkusàngaja,” udi ucìtabuuja, bwalu Yèyè ùkaadi mumanè kucyâmba. Mémè ndi ngâmbulula ànu cìdiYe mwâmbè.

²¹ Ne cikèènâ-kumòna cìdi ànu cyâmbulula cìvwâYe muleejè aci. Nudi bûmvwè anyi?

²² Mpindyewu swâyì bwâ tûlwijakajè ne tûbwelè buludi mu Dîyì, bwalu ndi mumanyè ne bààbûngì bàà kunùdi bàdi kaaba aka, bàdi ne kilòmèètâ yâbûngì yâ kwenza lwendu dilòòlò edi. Ndi nsambila bwâ Nzambi kunùbènèsha, ànùkwàcishèku ne ànùkùbè mu njila. Nènku mpindyewu ndi njinga kubuulula dilòòlò edi mu Maataâyì Munsantu, nshapità wa 21, ku mvensâ 1 too ne ku 11, mu Maataâyì Munsantu. Nènku, mpindyewu, wèwè kùyi ne Bible webè to, anyi pawikalâ muswè kufunda Mifundu eyi, mbîmpè.

²³ Mpindyewu bwâ nwènù bàvwâ kanùyìku buumvwè Diiyisha dyâ mu dindâ emu abu, kâdi biikàle ne cisanji cyâ dikwàta naaci mikàbâ yâ mèyi: Twètù katwèna tukèba, dipànyisha dyâ mikàbâ yâ mèyi to, kacya katùtu tukèba, dipànyisha dyâ cintu nànsha cîmwè to. Mîngâ misangu mu disangisha dinène nebàmanyishè ne bàdi ne mikàndâ kampànda kuntwaku; katwèna tupetamù cintu kampànda to. Mwanèètù Vayle ke mufundì. Mikàbâ yâ mèyi, muntu udi utàngila bwalu bwâ mikàbâ yâ mèyi ayi ke wânwambila, twètù katwèna tupetela mfrangâ mu mikàbâ yâ mèyi to. Katwèna. . .Bwalu kî mbwâ “mikàbâ yâ mèyi to”; m’Mukenji. Kâdi dîbâ didì muntu ùtèeka mu meeji èndè ne mbyâ mfrangâ, kâakutûngunuka ne kwenza kâbidì mikàbâ yâ mèyi to. Ncyâ bushùwâ. Mvwa munkaci mwâ kucìkonka, ngèèla meeji ne mikàbâ yètù yâ mèyi yìdi yisùmbishiibwa, mwînshì mwâ ndola yitaanu, anyi cintu kampànda, yisàtù too ne ku yitaanu, anyi cintu bu nànkù. Wamba ne? Isàtù; ne inaayi, bwâ mikàbâ yâ mèyi minène, mile ayi’s.

²⁴ Nènku mwambi kampànda, mvwa mukonke bwâ ùmwè wâ ku mikàbâ yèndè yâ mèyi, nènku ùvwa ndola citèèmâ, bwâ mukàbâ wâ wîpacila ku tusunsa makumi àbìdì anyi makumi àsàtù twâ diyiisha.

²⁵ Pa nànkù ndi mmòna ne Mwanèètù Sothmann udi paanyimâ pàapa wâwa kèna wènda ùshààla mubanji to, nànsha umwe wa kùdîbo, ku mikàbâ yâ mèyi yidîbo—yidîbo bàpàtula eyi’s. Nwamònu anyi, bàdi ànu bàpeta bûngì bukùmbàne bwâ kubâmbulwisha bwâ bôbò kutûngunuka. Ncyèna mwâ kubâlomba bwâ kuyènzabò ku bitupù to, bwalu bìdi bikèngela bwâ kwikalabò bàsùmba mikàbâ yâ mèyi ne bikwàbò byònsò. Ne

byamù bìdi ne mushinga wàbúngì be, bìdi biyiila mushinga wà wipacila ku binunu dikumi byà ndola bwà kwasa byamù biine byà kwenza naabì mikàbà yà mèyì ayi, twamb'eku twamb'eku.

²⁶ Mpindyewu, ndi ngumvwa nè àbìdì adi panshi aa ndi... ncyèna mwanji kucimanyisha to. Kàdi kùdi kàbìdì cisangilu pa bìdì bitàngila mikàbà yà mèyì. Ku musangu ne ku musangu tudi... balubuludi, ncyèna ne cyà dyenzamù to nànsha kakesè. Ncitu nànsha... nànsha mu cimwè cyà ku bisangilu abi to. Kamwèna ka—kansungàsungà to. Bàdi bàleeja mudimu ùdìbo bàjinga kwenzeja; balubuludi mbàtù bàngata dipàngadika dyà ne mmuntu kaayi udi ulonda mu dyenza dyà mikàbà yà mèyì, nènkù bàmutùmina mukàndà. Ke cyònsò cìndì mumanyè pa bwalu abu ncyòci aci. Bàdi bàtabaleela bwalu abu, bwalu mèmè ncyèna nànsha ne díbà dyà kulàmbula bàna bàà mu mabòkò to, pa kuumusha byà ditàbaleela mikàbà yà mèyì, nànkù, anyì kubàtiiza kwìnè.

²⁷ Pa nànkù àànyì meeji mmatèèka pa Mukenji ewu, s'ke Nkòkelu Mwisàtù awu, ne ku yèyè awu nkùndì ne cyà kwikala ne lulamatu ne kaneemu.

²⁸ Maatàayi 21.1 too ne ku 11. Ndi mwambè aci bwà nwamòna mwà kwikala bindile... anyì kubuulula mu Mifùndu.

Nènkù pàvwà... Nènkù pàakaseemenàbo pabwìpì ne Yelusàlèma, ne bàakalwa ku Betèfàjè, batàngile ku mukùnà wà Olèvè,... Yesù wàkatùma bàbìdì bà ku bayiidi bèndè,

Nè kubàmbila ne: Ndàayi mu musòkò ùdì mutàngilàngàne neenù awu, nènkù dyàkàmwè nenùsanganè mpundà mukàji muswika, ne mwànà wa mpundà mwikàle nendè: yisùlùlaayi, nènkù nùyintwàdìlè.

Kàdi muntu yèyè munùkonke, nwàmwbambila ne: Mukalenge ùdì naayi bwalu; ne dyàkàmwè yèyè neàyitùmè.

Byònsò ebi byàkenjiibwa, bwà kuujiibwa cyàkaakulàbo kùdì mupròfeta aci, wàmba ne:

Ambilaayi bàna bàà bakàji bàà mu Siyònà ne: Mònaaku, Mfùmù webè ùdì ùlwa kùdì, mupòle,... musòmbe pa mpundà mukàji, ne mwànà wa mpundà mwànà wa mpundà mukàji.

Ne bayiidi bàakaya, ne bàakenza mùvwà Yesù mubàtùmine dīyī amu,

Ki bōbō kutwàlabò mpu—mpundà mukàji awu, ne mwanèndè, ne kutèèkapu bilàmbà byàbò, ne kumusòmshabò pamutù apu.

Ne musùmbà munène menemene kwelawù bivwàlù byàbò mu njila; ne bakwàbò kukòsabò matambà à mici ne kuàsabo ku njila.

Ki musùmbà wà bantu wùvwà wùya kumpàla awu, ne bàvwà bàlondà abu, bèèla mbilà, bamba ne: Hòzaanà kùdi mwànà wa Davidi: Mubènèshùibwe ng'ewu udi ulwa mu dinà dyà Mukalenge; Hòzaanà mu myaba mitùmbùke.

Nènku pààkabwelàye mu Yelusàlèrà, cimenga cijimà aci cyàkanyunga, cyàmba ne: Ewu nganyi?

Ki musùmbà wà bantu awu kwambabò ne: Ewu n'Yesù muprófetà wa mu Nazalèetà wa mu Ngalèlà.

29 Mpindyewu bu mèmè mwà kwangacilakù cyena-bwalu, bwà tusunsa tutwè ku makùmi àsàtù kumpàlà kwà mulongo wà babèèdi kubangawù, Ndi mwà kwangata eci bu cyena-bwalu: *Edi Ndikòkiibwa Kaayi Nùnku Ku Mukùnà?*

30 Mpindyewu, cìvwa nditùkù dyà dizengèle be, dyà dibìnduluka, ne cìvwa nditùkù dyà pabwàdi. Tudi tusangana Yesù mwab'ewu ùbànda ku Yelusàlèrà, mudilongòlòle bwà kuya ku paasàkà. Ne paasàkà ki pàvwà mwànà wa mùkòkò wà paasàkà awu ùshebeyiibwa, ne pàvwà mashi àmyaminyiibwa pa nkwasà wa ngàsà bwà—bwà difuta dyà cibawu bwà—bwà bantu. Ne Yèyè ùvwa mufùmìne ku Betèfajè ne mulwè ku lusongo lwà Mukùnà wà Olèvè, ùdi mutàngile mwìnshì pa kakùnà kakwàbò kàvwà Yelusàlèrà mwibakilapù aku. Nènku pàvwàYe mutàngila, ne mumanye ne eci cìvwa dikùmbula Dyèndè dyà ndekeelu.

31 Eci cìvwa neikondo cìvwàYe mufwànyine kufidiibwa mu byanza byà bantu babì ne bóbò bàvwà mwà kuMushebeya. Ùvwa mwà kufwà lufù lwà lwènza bwòwà menemene lùdìbo kacya kabàyiku bânji kufwà kùdi muntu wa cifwàkà to, ne kujiikiibwa. Bàvwà mwà kuMutungila kùdi Bèndè Sungasunga, bàmwè bàà kùdìbo biimàne pàmwè Nèndè menemene. Ne Yèyè, mwikàle Nzambì, ùvwa mumanyè cìvwà mu m'yoyi yàbò, ne mumanyè kacya ku cibangidilu aku ne nganyi ùvwa mwà kuMutungila. Ne mumanyè ne muntu awu ùvwa Nèndè ùvwa musòmbe ku luseke Lwèndè ne ùvwa ùMubadila mfrangà Yèndè, ne bikwàbò, ùvwa mumanyè ne yèyè muntu awu ùvwa mwà kuMutungila. Kàbìdì ùvwa mumanyè ne nkùrusè wa cikisu wà Cyena Loomò awu ùvwa muMwindile kuntu kwàka. Ùvwa mumanyè ne màyi Èndè mu mubidi Wèndè ne Mashì à mu mubidi Wèndè bivwa mwà kutàpuluka, kàbìdì ne Mashì àvwa mwà kumacila mumpàlà Mwèndè, mamata manène menemene bu mùdi bikòpàkànyì. Yèyè ùvwa mumanyè ne byònsò abi bivwà kumpàlà Kwèndè. Ne Yèyè mmwimàne pa mukùnà, mutàngile ku Yelusàlèrà.

32 Bantu bàà mu ditùkù adi, ba...cìvwàbo bàbìikila ditùkù adi ne: “bantu bàà mu cipidi citàmbe bwimpè cyà

ntèndèleelu,” bàvwa baMukine. Èkèleeziyà yà mu matùkù awu yìvwa miMukine ne miMubenge, ne mibenge bònsò bàvwa bàMutèeleja. Nènku bantu bóbò baya ne bàakabwela mu tumpanyè Twèndè, bàvwa bìipaciibwa dyàkàmwè mu bwobùmwè bwà èkèleeziyà. Kabyèna bikèmesha to pàakambà Mufundu ne: “Yèyè wàkalwa kùdì Bèndè Sungasunga, kàdì Bèndè Sungasunga kabààkaMwakidila to.” Biinè bàvwa ne cyà kwikala baMunangè abu, biinè bàvwa ne cyà kwikala batwè ku Cyèndè abu, ki bàvwa beena lukuna Bèndè babì menemene, babyabàbyalè.

³³ Ne Yèyè ùkaavwa mwenzè kasùmbù Kèndè kakesè aku ne musùmbà wà bantu bapèlè, balòbi, balàmbwishi bàà bitàdì, kabàyi ne kàlaasà kalonga to. Bible mmwàmbè ne bàmwè bàà kùdìbo bàvwa mene “bapangi, kabàyi balongè mukàndà to.” Bàmwè kabàvwa nànsha mwà kufunda dìnà dyàbò to. Yèyè kààkayakù mu maèkèleeziyà bwà kupeta bantu Bèndè to.

³⁴ Ne Yèyè kààkapetanganakù nànsha ní nè nganyi yònsò wa ku balombodi bàà èkèleeziyà to. Nènku, pa kuumusha cyòci aci, Yèyè wàkalonda mmwènu menemene wa mupròfetà. Wàkapiisha bintu byònsò bìvwàbo benzè, mùvwà bàvwa kumpalà Kwèndè benze; bwalu bóbò bàvwa citùpà cyà Dìyì, ne Yèyè ùvwa Dìyì mu kaabujimà kààDì.

³⁵ Kàdì munkaci mwà biinè byònsò abi, mu cikondo ne cikondo cyònsò ne mupròfetà yònsò uvwakù awu anyì wìkalakù awu, nekwikalè mungà musùmbà wà bantu bàdì badyànjlila kulongolola bwà kutèelejabò mwinè Mukenji awu, nènku bóbò nebàWùlondè. Bóbò abu kabeena bàcyùka misùmbà to. Kabeena bàcyùka tudiwù twà beena bupidyà to. Bóbò—bóbò kabèèna bàkòkangana naabò to. Bóbò bàdì ànu ne cintu cimwèpelè cyà kwenza, cidi ànu cyà kwitabuuja ne kupeta katùpà ne katùpà kònsò kààDì kàdìbo mwà kupeta aku, kuCitùkija munda bu Màriyà wàkasòmba ku makàsà à Yesù awu.

³⁶ Nènku Martà ùvwa ùmulongolwela didyà Dyèndè dyà mundaamuunyà, ki Yesù kumwambila ne: “Kàdì, Martà, wèwè udi utàmba kucyùka bwà bintu byà mwoyi wà pànu, kàdì Màriyà mmukèbe bintu bitàmbe bwìmpè,” nwamònu’s, bintu byà Mwoyi wà Cyèndèlèlè.

³⁷ Mpindyewu, tudì tusangana ne bààbùngì bàà ku bantu bàvwa bumvwè. . . Kabàvwa ne mikàndà yà kubala bu mutùdì naayi leelù ewu emu to, kabàvwa ne byà ku tèleviziyò anyì tèlefonè, anyì ní ncinyi cyònsò, mu ditùkù adi to, kàdì bàvwakù ànu bu bapetè manungànyì à ne Yèyè ùvwa ne cyà kwikala ku difestò dyà paasàkà aku. Bwalu bààbùngì bàà ku bantu, biikàle ne meeji à nyumà, bàvwa bamanyè ne Yèyè nguvwa Mwànà wa mùkòkò wà paasàkà awu, bwalu Yèyè ùkaavwa mumanè kubàmbila bintu bìvwà ne cyà kwenzeka.

38 Ne pashiishe, mu bushùwà bwà bwalu, bamanyè ne Yèyè ùvwa ne cyà kwikala kuntwaku, ne biikale baMunange mùshindù awu, bàvwa baMwindile. Kùvwa musùmbà ùvwà pàmwäpa ùsàkilangana, ùpuusangana kuumukila ku eci ciibi too ne ku cikwàbò, bàtàngila mu njila yònsò, bwalu bàvwa bamanyè ne òmwè dyà ku mèbà awu Ùvwa mwà kumwènèka. Bàvwa bindile.

39 Bakwàbò bàvwa munkaci mwà kudyèbeja ne bwalu bùvwa cinyi ne bantu aba bàvwà munkaci mwà kunyeemakana bàtwa ku eci ciibi bàtwa ku cikwàbò. “Ndikòkiibwa kaayi edi?”

40 Nènku bàvwa mwà kutàngila *elu* luseke ne kutàngila *lwàlwa* luseke, bwà kujandula. Bivwa bimwèke ànu bu ne bàvwa bindile cintu kampànda, mu dindila dyà myoyi kuulukuulu dyà cintu kampànda civwa ne cyà kwenzeka.

41 Kaa, mùshindù mwìnè wùmvwà kujinga kushintulula cyena-bwalu cyànyi bwà ndambù wa tusunsa ne kwamba nùnkù, ne ke cidi munkaci mwà kupitakana leelù ewu ncyòci aci. Bantu bàdi bindila bwà kuMumòna ulwa bàdi ne myoyi yizùka bikolè ne batèkèmena ne myoyi kuulukuulu be. Tudi mwà kudyùmvwa, dicincimikiibwa adi. Nènku bàdi munkaci mwà kukèba, bàjooja dinyungakana dyònsò ne cimanyinu cyònsò, bàbipàlakaja ne Mifundu.

42 Ne pàakamònàbo bintu byònsò bìvwà bidyànjlila kwamba Bwèndè abi, too ne ku ndekeelu, bàakamanya ne ndekeelu ùkaavwa pabwipi. Bàvwa bajinga kwikala pòpù, pa nànkù bàkabandila. Citùpà cyà misùmbà yà bantu civwa citwè ku Cyèndè, mu banyàabanya. Bàmwè bàvwa bàbèngangana Nèndè, bààbùngì bàà kùdibo, byà pa lukàmà makùmì citèemà bàvwa bàbèngangana Nèndè.

43 Nènku s'ki mùshindù ùdìbi nànkù leelù ewu mu bisùmbù byà ntèndeleelelu, pàdibi bìkafika menemene kùdi Dìyi ne kùdi Kilistò, kùdi ànu bu cyà pa lukàmà cimwè cidi cifwànyine kuCìtabuuja. Cikwàbò citùpà kí ncifwànyine kutèyaKù ntèmà to, nànsha cinganyi ciikàle cyenjìibwe, mbafwànyine kwela minèkù yà mùshindù kampànda anyi kwakula bibi bwàCì. Bidi ànu byà mwomùmwè. Cikondo, bintu kabyèna bitàmba kushintuluka nànsha, bwalu-bulonda bùdi ànu bwènzuluka.

44 Èè, tudi tusangana ne aci cidi citàndabaja mijilu. Civwa ne cyà kutàndabaja mijilu. Cidi ne cyà kutàndabaja mijilu. Bàvwa bindile, bàvwa bàdyèla nkonko bwà civwàYe mufwànyine kwenza pàvwàYe mwà kufika. Bàvwa bajinga kwikala pòpù bwà kupeta cintu kanà cyònsò civwàYe mwà kwenza aci. Bàvwa baCiswe. Bàvwa baswe kuCimòna. Bàvwa baMwitàbùuje. Bakwàbò bàvwa bùmvwè nè Ùvwa ùlwa, ki kubàndabò kuntwaku bwà kuMwelulwila. Pa nànkù paanyimà pàà dindila mu dibìnduluka dyònsò edi, ditùkù dyà pabwàdi menemene, cikondo cyà pabwàci menemene, èkèleeziyà milààle tulù, mijilu

yà bantu yìwwa mitàndàbàle, kùwwa bantu bíngyabíngyàlè, ke pashìishe cintu kwenzekaci!

⁴⁵ Ku lusongo lwà Mukùnà wà Olèvà kulwakù mpundà mukesè, mutòòke, wènda ùpweka kakùnà aku, ne musumbà wà bantu bènda bèèla mbilà bu bakoleshi bàà maalu, bènda bàtùùla malala ku micì, bàkùpa bilàmbà byàbò mu njila, bèèla mbilà mikolè ne: “Hòzaanà kùdì Mwànà wa Davìdì udi ulwa mu Dìnà dyà Mukalenge awu!” Kùdì. . . kampundu kakesè aka, Mubàndi wakù ewu kàwwa mûngà muntu to ànu Maasiyà mwela maanyì wa Nzambi wa dībà adi.

⁴⁶ Nzambì, dībà adi, cìvwàYe wenza aci ncinyi? Aci ndikòkiibwa kaayì pa kakùnà apu’s? N’Nzambì wenza maalu-malonda, ne Nzambì mwikàle úja cipròfetà. Ne ciinè aci citu misangu yònsò ànu cilela dikòkiibwa kampànda. Cìdì citwàla badyùdi bwònsò, biminyi (byà Mukenji wà mu dindà emu abi’s), ne mikankù kàbìdì. Nwamònu anyì? Bààkadìsangisha bwà kujandula cìdì munkaci mwà kwenzeka. Bàmwè biikàle bàlwa bwà kumanya, bàngà bàlwa bwà kwangula bilèma, bàkwàbò bàlwa bwà kudyula. Kùdì mìshindù yònsò misanga, bu mutùvwà bàmbè mu dindà emu ne: beena kwitabuuja, beena kwitabuuja bàà budingibudingì, ne beena bupidyà. Cìdì ku mukùnà ncinyi? Cipròfetà cìdì munkaci mwà kuula. Mpindyewu netùmonè cìdì cyènzekà.

⁴⁷ Mpindyewu, mu Mukàndà wà Zekààyi, mu nshapità wa 9 ku mvensà wa 9. Zekààyi, umwe wa ku bapròfetà, wàkaakula mu Nyumà, wàmba nùnkù.

Sànkààyi bikolè, Nwènu bànà bàà bakàji bàà mu Sìonà; elàayi mbilà, Nwènu bànà bàà bakàji bàà mu Yelusàlèma: mònaaku, Mfùmù webè ùdi ùlwa kùdì: yèyè ùdi mwakàne, . . . mwikàle ne lupàndu; ne bupwekèle, ne mubànde pa nyama wa mpundà, pa mwànà wa mpundà, kànà kàà mpundà mukàji.

⁴⁸ Mpindyewu, bwalu bùvwà cinyi ne bafùndi abu? Mbwalu kaayì ebu ne baakwidi abu? Bwalu bùvwà cinyi ne batèndèleedi abu? Eci’s cyàkafùndiibwa bidimu nkàmà yinaayi ne makumi mwandamukùlù ne mwandamutekète kumpàlà kwà kwenzekaci, kùdì mupròfetà mushindika, ne bàkaavwa bamanè kufùnda mu mifùndu ne bayibìikìla ne m’Bible, mikàndà mivùnga yà Dipungila Dikùlukulu ayi. Bwà cinyi kabàvwà mwà kumòna ne aci ncipròfetà munkaci mwà kuula? Mbwà kabingila kàmwèkàmwè kàdì kènza ne kabèèna mwà kucimòna leelù ewu to. Bàvwà bangàte Dìyì dyà Nzambì baDìvwijè kadiciyì ne bukolè kùdì bantu nànsha, mu kulongesha (kwà bilèlè) kwà bilèlè byà bantu bu Dilongesha.

⁴⁹ Nènkù bu ne mufùndi, bayiishi, bambi, bantu bàà nyumà (bàà ku dìnà abu), balaaba maanyì, mwà kubala ànu Bible cyanàànà, kabàvwà mwà kwikala bènda bàdikonka bwà cìdì

munkaci mwà kwenzeka to, bàvwa mwà kwikala bamanyè cidiCi. Nzambi munkaci mwà kuuja Dìyi Dyèndè!

⁵⁰ Maalu-malonda àvwa munkaci mwà kwenjiibwa, cipròfetà cívwa munkaci mwà kukumbana. Lupàndù lwà bàà pa buloba lúvwa munkaci mwà kufika, ditùkù dinène divwà bapròfetà bònsò bindilèndile adi. Bònsò bàvwa mu lukità abu bàvwa bindile ditùkù adi (ekèlekèle, anji elàayi meeji ku bwalu abu), bònsò bàvwa bafwè, baakàne bònsò bàà mashi à bafwile diitabuuja ne bapròfetà abu.

⁵¹ Byà bwalu, Yèyè ùvwa ùfuma ku dyela lubilà lukolè ne: “Yelusàlèrà, Èyi Yelusàlèrà, wèwè udi wasa mupròfetà yònsò ùndi nnùtùmina mabwe, ne ushebeya baakàne ewu, mmisangu bùngi kaayi yínkaadiku Mèrà ewu muswè kukukungwija mùdi nzòòlo wa cikuka mwà kukungwija, twàna twèndè, kàdi wèwè kwàkaswà to. Kàdi mpindyewu dîbà dyèbè dyàlu.”

⁵² Bònsò bàvwa mu lukità abu, Abraham, Izàkà, Yakòbò, bapròfetà bònsò abu, bàvwa bindile dîbà edi.

⁵³ Kàdi èkèleziyà ùvwa mufofomijìbwe ku Cyòci aci. “Nganyi udi wenzeja mutooyi wònsò ewu? Muntu awu Nganyi?” Bààkamba musangu kampànda ne: “Awu kí mmwàna wa balume wa mukoonyi wa mabaya ewu anyi? Tudi baMumanyè. Nkwèpi kudiYe mupete lungènyi elu? Mòna’s, twètu katwèna tuMumòna muswikàkàne ne nànsha cimwè cyà ku bilongelu byètù to. Katwèna bamanyè mukàndà nànsha ùmwè ùdìYe mulongèle nànsha. Nganyi mwinè ewu?”

⁵⁴ Yèyè ùvwa dyandamuna dyà cipròfetà cyà mupròfetà. Ki Yèyè ulwàlwa ewu, wènda wèndela pa mwàna wa mpundà. Dikòkiibwa kaayipu’s wè! Nzambi ùvwa munkaci mwà kuuja Dìyi Dyèndè dilaya, dîbà divwà dindila kacya ku bidimu binunu binaayi. Mu Genèsè, nshapità mwi3 ku mvensà wa 15, Nzambi ùkaavwa mudyànjlile kwamba dîyi ne: “Dimiinu dyà mukàji nedizaazè mutù wà nyòka, kàdi mutù wèndè newùmuzaazè cikànkanyà,” cipròfetà aci mu Bible mwònsò cívwa cidyanjila kwamba bwà Muntu uvwa ne cyà kulwa awu aci.

⁵⁵ Kàdi mwab’ewu ànu àbìdi àdi panshi aa kùvwa mupròfetà kampànda uvwa mwimane munkaci mwàbò, uvwa mupròfetà mushindikiibwe, Zekàayi, e kwambayè, ne: “Nwènu bàna bàà bakàji bàà Yelusàlèrà ne nwènu bàna bàà bakàji bàà mu Sìonà, sànkayyi, elàayi mbilà, elàayi mbilà mikolè, bwalu Mfùmù webè ùdi ùlwa kùdi, mupòle ne wa mmwènekèlu mupwèkèle ne mudipwèkèshe, mubànde pa mwàna wa mpundà.”

⁵⁶ Ne apa bantu bàdi bàbalà Mufundu awu abu, ku ditùkù ne ku ditùkù, kuMubandilabò ùlwa mubwele mubànde pa kàbalù, kwelabò lubilà ne: “Ewu nganyi?” Nwamònu anyi? Nzambi munkaci mwà kuuja Dìyi Dyèndè kùdi bantu bàvwa ne cyà kwikala bamanyè ne Cívwa ncinyi, kàdi kabàvwa baCimanyè to.

⁵⁷ Cikondo cidi Nzambi ùkumbaja Dìyi Dyèndè, Didi ditwàla ànu dikòkiibwa, misangu yònsò, didi ànu dyènta nànkù misangu yònsò. Didi ditwàla dikòkiibwa, bwalu kaDyènta dyà ciibidilu to. Kabiyikù byà ciibidilu to, pàdiYe ùkumbaja Dìyi Dyèndè bwà mmwènenù wa cyena leelù wa ditùkù adi, bwalu mmwènenù wa cyena leelù wa ditùkù edi kèna ùDìitabuuja to. Ùdi ne wendè njila wa sungasunga.

⁵⁸ Mpindyewu, tudi tumòna, nènku twàlukilàayi mu Mifundu ne twàngatà myandà mikwàbò yà pabwàyi, ànu bwà ndambù mikwàbò wa tusunsa cyanààna, pàakakumbaja Nzambi cipròfetà Cyèndè. Pàdi Nzambi wamba cintu kanà cyònsò eci, Yèyè neàcyènzè. Maulu wònsò ne buloba nebijiminè, kàdi Dìyi adi kadyènakù mwà kujimina to. Pa nànkù Dìsòmbèle ànu ditwàla bwalu, bwalu bùdi kabùyi bwà ciibidilu nànsha.

⁵⁹ Mònaayi mùdi Dìyi dyà Nzambi dicimbè bwà—bwà cisàmbà cidi ne cyà kuDìitabuuja, ne nànsha nànkù ndyà kaDìyi dyà ciibidilu mu mùshindù wà ne bàdi bèèla mbilà mikolè ne: “Èè, ncinyi eci? Nkwepi kùdi mufwànyine kupetela cintànkanyi aci? Ewu nganyi? Ncinyi eci?”

Pàabi's, bìvwa bikèngela kwikalabò bèèla mbilà mikolè ne: “Hòzaanà kùdi Mfùmù udi ulwa mu Dìna dyà Mukalenge awu!” Kàdi kùvwa ànu kasùmbù kakesè cyanààna kàdi kenza nànkù, ànu kasùmbù kakesè cyanààna.

Munda mwà bidimu binunu bìnaayi byà cipròfetà, bwà cintu cyà citàmbe bunène cikaadiku cifwànyine kwenzekela ditunga, bwalu ditèkemena dyònsò dyà bafwè ndishindàmèenePù, matukù àcilwalwà ónsò mmashindàmèenePù; ne batèndeledi, bàvwa bàlàka mukana bàmba mùvwàbo baCiiatàbùùje, bàvwa bèèla mbilà mikolè ne: “Nganyi Awu's? Nènku ndikòkiibwa kaayi edi's?” Cintu kampànda cyà kaciyi cyà ciibidilu to! Byà mwomùmwe, kaciyèna ànu cishintuluka to, mpindyewu cyà kaciyi cyà ciibidilu to.

⁶⁰ Twànji tùmònaayi bì bimwè byà ku bintu byà kabiyi byà ciibidilu to, bu mùnkaavwà ànu mwàmbè. Ncinyi cìvwa dikòkiibwa ànu kumpàla mene kwà cilumbulwidi kutuutaci buloba ne kubùbùtula ku màyi? Muntu mununu, wa bidimu bìpacila ku lukàmà ne makumi àbidi, munkaci mwà kwibaka bwátù dìbà dìvwàku kakùyi nànsha màyi à kubwèndeshilamù to. Kuulu kwàka munda mwà bidimu, mwimàne mu ciibi, wènda wibaka munda, lwà munda amu, ne kubùshingwila munda ne pambèlù, ne kwamba ne: “Buloba nebùminyiibwe bwònsò kùdi màyi,” cikondo cinène cyà maalu à mamanya.

⁶¹ “Ncinyi cìdibu bàtuuta kuulu kwà mukùnà kwàka's?” “Mòna's, s'mmuntu mukùlumpè dìnà dyèndè Noà, ne yèyè's ùdi kuulu aku, mukoleshi wa maalu wa kale. Muntu mununu awu ùvwa mwimàne mu muunya ntàntà mule. Muunya mmumwòshè. Lungènyi ndumujimìne; Nènku nyèyè awu munkaci mwà

kwibaka cidiye ubiikila ne ‘mbwâtù aci,’ ne wàmba ne mâyi àdi àlwa àfùmína muulu mùdi kamùyì mâyi mwàmwa, nebwàmbulè bantu bônso e kunyunguluka naabò; ne muntu yônso udi kàyì ùtèèleja mukenji wèndè awu, ne muntu yônso udi kàyì muswè kubwela mu bwátu abu awu, neáfwe mu mâyi. Kacya nukàadikù búmvwè cintu bu nàнку anyi?” Cívwa dikòkiibwa dyà pabwàdì!

62 Ndi ndifwànyikijila ne pàvwà bantu bàjinga bwà kuseka bilenga, bàvwa bàbànda bàkiimana ku mushikù wà mbèlù wà bwátu kàdi kutùdika ne tuseku’s. “Mòna’s, wèwè’s wákamba ne mvùla neàlokè kùkaadi bidimu lukàmà’s! Kaakù muntu mulùme kungambilaye ne wàkakumvwa kuntu eku wamba ne mvùla neàlokè, kàdi ucidi ànu utùngunuka ne kwenda kutuuta pa cintanyi cyà kale cyà mabaya eci. Bwà cinyi kwènà mwà kupinganakù mu wèwè?”

63 Kàdi ùvwa n’Nzambi mwikàle udilongolola bwà kushindika mulayi ne bwà kuuja cipròfeta cívwa mupròfeta Wèndè mwenze. Cyà pabwàci menemene’s! Nzambi munkaci mwà kuuja mulayi Wèndè kùdi Noà, pàvwà bakwàbò munkaci mwà kuseka apu. Nzambi ùvwa kàbidi munkaci mwà kudilongolola bwà kwenza maalul-malonda bwà kuleeja bakwàbò, nànsha too ne ku ditùkù edi, bwà ne Yèyè ùdi ùshààla mukwàte ku Dîyi Dyèndè! Nànsha byòbi bìmweka kabiyi bilelèlè, ne kabiyi byà meeji bishi, Yèyè ùdi ànu ùlama Dîyi Dyèndè. Ùvwa ucýenza cileejilu, mu muntu mununu uvwa munkaci mwà kupoopa bintu pa bwátù awu, bwà bantu aba bàdi muneemu mu Àmèrikè dilòòlò edi ne pa buloba bujimà. Cidi maalul à mamanya àmba nànsha ciikàle cinyi, cidìbo bàmba, *cikampànda*, *cikansanga*, anyi *cikankènga*, Yèyè ucidi ànu ùshààla mukwàte ku Dîyi Dyèndè. Ùvwa munkaci mwà kwenza maalul-malonda.

64 Cívwa dikòkiibwa ncinyi ditùkù kampànda; cintu cyà pabwàci cyàkenzekà mu cipèèlè mwàmwa, ne cívwa ncipuka cívwa cilàkuka kapyà. Ne mupròfeta munyemakanyi ùvwa mwimàne mu cipèèlè amu. Kàvwaku muumvwa dîyi to, kàvwaku muumvwa mwadi kampànda to, kàdi kutàngilayè e kumòna cintu cyà pabwàci pa lusongo lwà mukùnà. Nzambi ùvwa ùteeta bwà kukòka ntèmà yèndè. Ki cyòci cimwècimwè cidìku leelù ewu aci!

65 Nzambi ùvwa munkaci mwà kudilongolola bwà kuuja Dîyi Dyèndè, dyà kùdi mupròfeta Wèndè Abraham ne: “Dimiinu dyèbè nedìikale dyenyi munda mwà bidimu nkàmà yinaayi mu buloba bwenyi. Mémè nèm̀bàpàtùlè ne cyanza cyà bukolè.”

66 Nènku Yèyè ùvwa munkaci mwà kulongolola muntu bwà mudimu awu, ànu muvwàYe munkaci mwà kulongolola bwátù bu kaaba kàà dikùbiibwa bwà bônso bàvwà bafwànyine kwitabuuja abu. Nzambi wàkateemesha kaacipuka aka kapyà, ne mulami wa mikòòkò ewu, Mòsà, kwambayè ne: “Nènku dimukè ànu ku luseke bwà kumòna cidì cintu cyà

pabwàci eci cyùmvwija.” Nènku pàakabàndishàYe Mòsà ku cipuka aci, Wàkaakula nendè.

⁶⁷ Ncinyi cìvwà dikòkiibwa pashiishe ku cibambalu cyà Pilaatù, pàakeelà mulami wa mikòòkò ewu dikombo panshi ne kwandamukadi nyòka? Nzambi munkaci mwà kuuja mulayi Wèndè kùdì Mòsà. Ncinyi cìvwà dikòkiibwa ku Mbù Mufwè awu, pàvwà tùbalù twà Pàlò tukèmèshiiibwe twònsò, pàakamònàbo cipeepèlè cicolè cifùmina mu mauulu ne cikòsolola Mbù Mukunze kuumukila ku dyàbalùme too ne ku dyàbakàji; ne musùmbà mukwàte nè luse wà bapika, wènda ùya mu mudimu wà Nzambi, bènda bàkòsolola mu buloba bùmè abu? Cìvwà ncinyi? Nzambi munkaci mwà kukwàta ku Dìyi Dyèndè. Lufù lwàkatentemuka, cisàmbà cidì ne mwoyi cyàkaya dyàmwàmwa; kàdi bantu bafwè bàà mu nyumà bàakateeta kucitentula, kàdi kutùkinabò mu mâyi. Nzambi munkaci mwà kuuja cipròfetà ne wènza maalumalonda. Ke cìvwà dikòkiibwa dyà ku Mbù Mufwè ncyòci aci.

⁶⁸ Cìvwà dikòkiibwa mu ditùkù diibìdì paanyimà pàà cyòci aci, ku Mukunà wà Sinàayi ncinyi, pàakatùminàbo bantu bònsò dīyi bwà kabàseemenyi kùdì bakàji bààbò to, pàakabàlòmbàbo bwà kusukula bilàmbà byàbò ne kudijidilabò bòbò biinè, ne kudisangisha banyùngùlùkile mukunà kampànda kùvwà muntu kampànda dīnà dyèndè Mòsà mwambè ne wàkatwilangana ne Nzambi mu Dikunji dyà Kapyà aku? Nènku Nzambi ùkaavwa mwambile Mòsà ne: “Nèntùùlukè munkaci mwà bantu. Nènshindikè cìmvwà munwàmbile aci, ne Mémè ndi Nganyi. Nèmbàleejè ne Mémè ndi Nzambi awu.” Ke cìvwà dikòkiibwa ncyòci aci, Nzambi munkaci mwà kuuja Dīyi Dyèndè.

⁶⁹ Ncinyi cìvwà dikòkiibwa ditùkù adi mu maalu-malonda, pàvwà ditùnga dipwè Nzambi mwoyi, mùvwà bantu bashààle bàà mmwènekèlu wa kwisùkwisù ne kabàyi bàcyùka myanda, mùvwà baakwidi bònsò baditwe mu mmwènenenu wa cyena leelù awu, bapròfetà bamba cipròfetà bilondèshile diswa dyà baakwidi? Nènku mu ditùkù adi, bu pa ciibidilu, bàvwa ne muntu umwèpelè uvwabò bèela meeji ne mmukoleshi wa maalu. Wàkaakula bwà bakàji bàvwà bàdilaaba bilaabu byà kwisù, ne bikwàbò byònsò, ne yèyè ùvwa muntu wa mùshindù wà pabwèndè. Ki mukùlumpè ewu kulwayè e kwambila mfùmù ne: “Nànsha lumuma kalwàkubiikilaku to...kalwàkulwa to ànu pàngàalùbiikilà mémè.”

⁷⁰ Kàdi tudi tujandula, dībà adi, ne ùkaavwa musokòme ne mucinyeeme, ne wàkasokoma mu cipèelà mwaba kampànda. Baanyàndè kwelabò meeji ne pàmwàpa ne ùvwa mufwè ne nzala anyi mubùtuke; kàdi's ùvwa mudisha byà bimpè ebi, munwisha mâyi, kàbidì. Kàdi's ki yèyè ewu, kutùùlukayè e kwamba ne: “Nudi numòna ne ndi ne EMU MMÜDÌ MUKALENGÈ WÀMBA anyi? Mpindyewu, nwènù kanùyì ànu bânji kutwishiibwa to, tuyaayi ku lusongo lwà mukunà bwà

tùjaadikè ne nganyì udi Nzambì,” bwalu ùvwa mupetè cikèènà-kumòna cikwàbò cyà kùdì Mukalenge.

⁷¹ Yèyè kwamba ne: “Dìsungwilaayi cyo—cyoshelu, ne nùcyènzàayi, ne—ne nùsungule ngombe ne nùmushipe. Nèngènzè cyoshelu cyà Mukalenge, ne nèntèkè kàbìdì ngombe pa cyànyì. Bònsò bwètù netwenzè mulàmbù ne kulekela ne Nzambì udi Nzambì awu wàndamuna.” Yèyè kàvwa mufwànyìne kwikala mwenze cyòci aci to nànsha kakesè bu Mukalenge kàyì mumwambìle; wàkamba nànkù pashìishe ne: “Ndi mwenzè cyòci eci ku . . . byònsò ebi, ku dīyì Dyèbè ditùma, Mukalenge.”

⁷² Kàdì ndikòkiibwa kaayì edi? Kwàkadi baakwidi nkàmà yìnaayi biimàne pa kakùnà apu, ne mfùmù mwimàne mu dikalù dyèndè dyà mvità amu, ne byà mvità byèndè byònsò ne balami bèndè biimàne eku ne eku. Nènku mukùlákàje ewu, wa myòsà bu yà mìkòòkò pambidi, kwìsù kubwikila kwònsò kùdì makuuyi, ne dibàla mu mutù, ne nsukì mimupwekèle mu mpàlà mwèndè, nè cìpese cyà cìseba cyà mùkòòkò cidijingila pambidi, ne myòsà pambidi pèndè pajimà apu, mwimàne mwaba awu ne dikombo mu cyanza, ne kàsù kàà maanyì mu cyanza cikwàbò; wàkamba, bidimu bisàtù ne citùpà kumpàla kwà cyòci aci ne: “Nànsha lumuma kalwàkumatakù to too ne pàngàalùbìikilà, bwà kulwalù,” wàngata kaaba kàà Nzambì, ne bintu byà mùshindù awu bu makènkè ne mindidimbì, ne byònsò bìvwàbò bààkula abi. “Nènku ke mukùlumpe mukoleshi wa maalu ewu mwimàne kuntu kwàka pa kakùnà apu, mutwàle bantu bònsò aba kuulu kwàka.” Ncinyì cìvwà dikòkiibwa adi? Cìvwa n’Nzambì ùdìlongolola bwà kushindika mupròfeta Wendè ne ùvwa mulelèlè. Cìvwa n’Nzambì munkaci mwà kuuja cipròfeta. Nzambì kàbìdì munkaci mwà kwenza maalu-malonda, munkaci mwà kuuja Dīyì.

⁷³ Ndambù wa nkàmà yà bidimu paanyimà paa cyòci aci, kùvwa muntu mulaaba ne Nyumà umwèumwè awu, ne wàkapàtuka mu cipèèlè, kàyì muswikàkàne ne bulongolodi nànsha bùmwe to; nànsha mùvwà tatwèndè muntu wa mu bulongolodi amu, mwakwidi wa mu mulongo kampànda. Kàdì yèyè wàkapàtukila mu cipèèlè, muvwàle cisèbà cyà mùkòòkò pambidi, nsukì mumpàlà mwèndè mwònsò emu. Pamutù pàà kwikalayè ne nsukì mvyà, yìvwa mifike. Ndikòkiibwa kaayì dīvwà naadi muntu ewu dyàkakòkà Yelusàlèmà yònsò ne Yudààya? Bàmwe bàà kùdìbò bàpàtuka bàmba ne: “Kùdì muntu muntu wa mu cisuku kwìnshì kwàka. Ùdì ùteeta bwà kutùkija bantu mu màyì. Nganyì ukàadikù muumvwè cintu bu nànkù awu’s?”

⁷⁴ Bakwàbò bàvwa bàjinga kumanya, bàmba ne: “Ewu ùdì ne cyà kwikala Maasiyà.” Umwe wabò kwambayè ne: “Mmufwànyìne kwikala umwe wa ku bapròfeta.” Kabàvwa bamanyè cyà kwelangana meeji to. Kàdì cìvwa ncinyì? Ùvwa n’Nzambì munkaci mwà kuuja Yeshàayi 40, mwaba wùdìYe

mwâmbè ne: “Mònaayi. . .” cìvwàYe mwà kwenza mu matùkù à ndekeelu, mùvwàYe mwà kutùma musadidi Wendè ne cìvwàye mwà kwenza.

⁷⁵ Pashìishe tudi tusangana, ndambù wa mbingu paanyimà pàà cyôci aci ne, muntu awu ùvwa mutwishìibwe menemene bwà mukenji wèndè, mu mùshindù wà ne yèyè wàkamba ne: “Kùdi Kampànda mwimàne munkaci mwènù emu, Wùndi nciyi mukùmbàne bwà kwambula bisàbaatà byèndè to. Yèyè neànùbàtiizè ne Nyumà Mwimpè ne Kapyà, mùndi mèmè mubàtiizè ne mâyi.”

⁷⁶ Dìngà ditùkù edi Nsongàlùme kampànda, wa ciibidilu, wa bidimu bitwè ku makùmi àsàtù, wàkapweka e kubàtiijibwayè. Nènku pààkalwà mwinè Muntu ewu, kùvwa dikòkiibwa dyà kacya kùdi mupròfetà, mupròfeta kwenza cintu cyà dikèma ditùkù adi. Disangisha kadìvwa mwà kupanga kubandila cyenzedi cyà mupròfetà awu nànsha.

⁷⁷ Pàvwàye ùkòkangana ne baakwidi dyàmwàmwa dyà musùlu, bòbò kwamba ne: “Nzambì ngwakiibaka cyoshelu eci. Nzambì ngudi mutwàmbìle bwà kwenza cyôci eci. Mòsà ki mupròfetà. Twètù tudi twitabuuja Mòsà. Mulàmbù awu kawàdyàkuumushiibwakù to.”

⁷⁸ Ndi mwà kuumvwa Yone wàndamuna, wàmba ne: “Kanùtukù babalè mu Mifùndu cìvwà Danyèlè mupròfetà mwàmbe ne: ‘Mulàmbù wà bwàcyàbwàcyà newùjikè’ anyi? Nènku dìbà adi dyàfiki! Kanùtukù babalè cidì Yeshàayi mwàmbe mu nshapità wa 40 ne: ‘Dìyi dyà ewu udi wela lubilà mu cipèèlà nè, longòlòlaayi njila wa Mukalenge’ anyi? S’ki bipròfetà bibìdi bwànyì mèmè. Nè cikwàbò cintu, kanùvwa bajingùlùle mupròfetà wetù kùkaadi bidimu nkàmà yinaayi, Maalàki, pààkaakulàye mu nshapità mwi³ wàmba ne: ‘Mònaayi, Ndi ntùma mùsànjeelà Wanyì kumpàlà Kwànyì, bwà kulongololayè njila’ anyi? Kanwènaayikù bamanyè ne eci cidì cyùja cipròfetà anyi?’ Cipròfetà cìvwa munkaci mwà kuula!

⁷⁹ Ki pa diine dìbà adi mupròfetà kukùdimuka e kwamba ne: “Mònaayi, ke Mwànà wa mùkòòkò wà Nzambì udi umusha mpèkaatù wa bàà pa buloba ulwàlwa ewu’s!” Mpindyewu dikòkiibwa dìdi cinyi? Mbishintùlùke byumùke ku mupròfetà biyè ne ku cipròfetà cyèndè.

⁸⁰ Mònaayi cidì cyèzekà. Ke Muntu wetù wa pàtupù ùlwalwà ewu’s, kàyi mumanyike kùdi muntu nànsha umwe, mwànà wa balùme wa mukoonyi wa mabaya, ùbwela mu mâyi. Pàvwà Yone, mupròfetà munène awu, wàmba ne: “Bidi bikèngela bwà mèmè kubàtiijibwa kùdi Wèwè. Udi Wèwè ulwa kùndi bwà cinyi?”

⁸¹ Yèyè kwamba ne: “Itàbà bwà bìikalè nànkù. Kàdi, bu mupròfetà ne Dìyi, mbujitu butwimikila bwà twètù kukùmbaja bwakàne bwònsò.”

82 Pa nànkú kuumvwayè ne bìvwa bikèngela bwà Mulàmbù kusukudiibwawù kumpàla kwà kufidiibwawù, nènku kuMubàtiizayè.

83 Mpindyewu kùdi dikòkiibwa dikwàbò dyàkenzeka díbà dyàkapàtukàye mu màyi adi. Mupròfetà ewu uvwa ne lulamatu bwà kwamba cikondo cyèndè ne díbà dyèndè, wàkabàndisha mèsù muulu e kumònayè mauulu munzulula. Yèyè kumòna Nyumà wa Nzambi, mufwànàngàne ne nkuci, ùpweka pambidi Pèndè, ne Díyi dyàmba ne: “Ewu m’Mwan’Àanyi munanga Mwena munda Múndi musànkile bikolè.” Nzambi ùvwa munkaci mwà kushindika mukenji wà mupròfetà, cívwa munkaci mwà kukòka ntèmà ku Yadènè.

84 Mwanèètù kampànda ùvwa wimba musambu katanci aka, anyi ùvwa ne cyà kwimba musambu ne: “Pa tukùnà twàtwa kule kúvwa kwimàne nkùrusè mukàyàbàle wa kale awu.” Ndikòkiibwa kaayi ku Mukùnà wà Kàlvaryò? Patùdi tumòna ne bukwantèndeleeleu bwàkaMupiiisha, ne bukalenga bwà cyena Loomò bwàkaMukòsela cibawu cyà lufù. Kàdi ki Yèyè ewu mulembeleja pankaci pàà benzàvi bàbidì, ùfwa ne nyòtà yà màyi, Mashi àzònta mu mubidi Wèndè. Ki Yèyè udi mukùdika wàwa, ùdila mwadi ne: “Nzambi Wanyì, Nzambi Wanyì, WàNdekèdi bwà cinyi?” Ne beena ntèndeleeleu biimàne mwaba awu, bamutàngile, kabàvwaku mwà kumanya ne cipròfetà cyà mu Dipungila Dikùlukulu cívwa cyùlè ànu mwaba awu mene ku Kàlvaryò pa díbà adi to.

85 Davidi yèyè mwinè wàkafùnda, kwenza maalu... wàkatuntumunyiibwa mu Nyumà bu bapròfetà bònsò, wàkenza maalu bu ne ùvwa n’yèyè. Davidi wàkeela lubilà, mu Musambu wà 22 ne: “Nzambi Wanyì, Nzambi Wanyì, WàNdekèdi bwà cinyi? Mifùbà Yànyi yònsò yikaadi miNtàngile. Bātùbulu byanza Byànyi ne makàsà Àanyi.” Davidi, wàkula bu ne ùvwa n’yèyè. Ne kàvwa n’Davidi to, ùvwa n’Kilistò mu Davidi.

86 Kàdi apa cipròfetà ciinè cyàkapàtukà aci, cyà bapròfetà bònsò bashiilèshiiàngàne abu, cívwa munkaci mwà kuula pa Mukùnà wà Kàlvaryò. Ndikòkiibwa kaayi edi pa Mukùnà wà Kàlvaryò? Nzambi munkaci mwà kukùmbaja Díyi Dyèndè.

87 Dikwàbò dikòkiibwa dívwa pa mukùnà, dívwa mmu Ditùkù dyà Mpenta, díbà dívwàbo bònsò kuulu aku mu difestò dyà ntèndeleeleu, bèèlà meeji ne bàvwa buumùshe bakoleshi bàà maalu bònsò abu. Kabàvwa buumvwe bwalu bwàbò to munda mwà matùkù dikumi. Dyàkàmwè, byenzè ànu bu kazùbù kàà mbùlumbùlù, e kupàtukabù mu nzùbu wa kuulu awu, kupàtukabò kuya mu mìsèèsù, bènda bèèla mikunda bènda bèèla mbilà.

88 “Eci ncinyi? Eci cìdi cyùmvwija cinyi? Bantu bònsò aba mbakwàcike maalà anyi?”

⁸⁹ Tàngilàayi! Ne mupròfetà kajuukayè munkaci mwàbò, mùtù ngenzèlù wa mupròfetà ne cyà kwikala, e kwamba ne: “Nwènú beena Izàlèlèlè, ne nwènú bàdì basòmbèle mu Yudàaya, mu Yèlusàlèmà, eci cìmanyiibwè kunùdì, ne tèèlejàayi mèyì àanyi. Bantu aba kí mbakwàcìke maalà munùdì nwènú nwela meeji ne mbakwàcìke amu to. Kàdì eci ncyàkaakwila Mukalenge kùdì Yowèlè, mupròfetà ne: ‘Nebyènzekè mu matùkù à ndekeelu ne, Mémè nèmpongololè Nyumà Wanyì pa musunya wònsò.’” Ke cìvwà dikòkiibwa ncyòcì aci.

⁹⁰ Batèndeleeedi, paanyimà pàà bamanà kupoopela Mfùmù wa Mwoyi pa nkùrusè, ne bikwàbò byònsò, kabàvwa ànu bânji kumòna mulayi wà dilwa dyà Nyumà Mwímpè to. Dikòkiibwa dyà ne: “Ewu nganyi? Eci cìdì cyùmvwija cinyi? Mbwalu kaayi ebu ne bantu aba’s?”

⁹¹ Kaa, ekèlekèlè! Ncintu cìmwècìmwè aci leelù ewu. Netùcingulukè byàbùngì byà cyòcì eci bwà kucìfikisha pa dìbà edi. Cintu cìmwècìmwè aci cìdìku leelù ewu. Cintu cìmwècìmwè aci cìdì munkaci mwà kwenzeka. Lukonko lùmwlùmwlùm wè alu ndwediiibwe ne: “Mutooyi wònsò awu ngwà cinyi?” Tàngilàayi eku ne eku kwà mùsèsù, tùshinyì tùdì tùfùmina ku Michigan too ne ku Floride, tùfùmina ku Maine ne ku Californie. Mu dindà emu pàmvwà ngenda mpàtuka ne màshinyì, anyi ànu paanyimà pàà dìbà nkànkalà, tuvwa twenda tupweka ne mùsèsù, mukàjàanyi ne mémè tuvwa twenda tutàngila mikàndà yìvwà milamika ku tùshinyì. Ke kòkò aku kùmvwà mwelèle meeji ku cyena bwalu eci.

“Eci cìdì cyùmvwija cinyi?”

⁹² Ànu mwàkambà Mufùndu ne: “Mwaba ùdì Citàlù, ke wàdisangishilà mikankù.”

⁹³ Mémè kwambila mukàjàanyi ne: “Munanga wanyì, udi muvùlùke dilòòlò dishàale adi dìbà dìmvwà ne cyà kulayangana ne cintu cyònsò cìvwà ne mushinga kùndì pa buloba, ne kubwela mu madimi à bwambi bwà kubanga cintu kampàndà cìvwà Nzambi mwambè bwà kwenza anyi? Wèwè kwimba musambu awu.”

Kaa, nebàfuminè ku Esètè ne ku Wesètè,
 Bàfùmina ku malaba à kule,
 Bwà kwenza difestò ne wetù Mfùmù, bwà
 kudya bu babiiikiidiibwè Bèndè;
 Mùshindù mwinè udi beena lwendu aba
 babènèshiiibwe’s we!
 Bàbandila mpàla Wendè mujidila
 Ùbàlakana ne dinanga dyà Nzambi awu;
 Baabanyanganyi babènèshiiibwe bàà ngàsà
 Wendè,
 Bu bilengà ku cifulu cyèndè cyà butùmbi
 netùkenkè.

94 Ke cidi dikòkiibwa aci's. Dimiinu didyànjila-kulongolola dyà Nzambi didi kadiyi mwà kwenza cingà cintu to ànu kuWùlonda, bìdi ne musinga kutàmba ne mwoyi kutùdi. Angàta myoyi yètù, kàdi kwàngaci Aci to. Ndikòkiibwa kaayi adìs? Nzambi, bu pa ciibidilu, mwikàle uuja Dìyi Dyèndè. Yèyè ùdi munkaci mwà kuuja Dìyi dyà Zekàayi cyàkàbìdì, dyà mupròfetà Zekàayi.

95 Mwaba wùmvwà mubalè mvensà wa 9 kùkaadi katanci, pàakabwelà Yesù mu ntempèlù Wendè, mubànde pa kàbalù . . . anyi pàakabwelàYe mu Yelusàlèmà, mubànde pa mwànà wa mpundà mutòoke, cipròfetà ciwà Zekàayi mwambe cyàkuula. S'ki Cyòci eci ne: "Sànkaayi bikolè, Éyi bânà bàà bakàji bàà mu Sionà. Elàayi mbilà, Éyi bânà bàà bakàji bàà Yelusàlèmà. Mònaaku, Mfùmù webè ùdi ùlwa kùdi; Yèyè ùdi mwakàne, ne mwikàle ne lupàndù; mudìpwekèshe, mubànde pa mpundà, ne pa kànà kàà mpundà mukàji awu." Ke ciwà dikòkiibwa dyà mu Yelusàlèmà ncyòci aci, ku ciimamwèndè wa bukalenge cyà ntèndeleeu.

96 Mpindyewu tudi tumòna mwanda wà mikùkùkù wà mu ditùkù dyà ndekeelu wènzeka! Tùbuululàayipù ndambù wa mabèji, mu Zekàayi, tùmònèbi cyàkambàye bwà bwinè bwalu ebu. Tùcyangàtaayi bwà matùkù à ndekeelu. Aci's ciwà ncikondo cyà pankaci; tubuululàayaaku mpindyewu mu matùkù à ndekeelu. Nènku tùbuululàayi mu Zekàayi, nshapità wa 14, ne kubangila ku mvensà mwi4. Nènku tèèlejàayi! Nènku netwikalè mwà kubala katùpà kàà Mufùndu, mvensà mitwè ku citèemà, kuumukila ku 4 too ne ku 9. Tèèlejàayi ne ntèmà. Ne cidi cyàmba cipròfetà cyà Dilwa Dyèndè, matùkù à ndekeelu. Tèèlejàayi ne ntèmà mpindyewu. Eci cidi ng'EMU MMÛDÌ MUKALENGE WÀMBA. M'Mifùndu, Zekàayi 14. Nudi bavùlùke Zekàayi 9, cyàkambàYe aci anyi? Kàdi kabààkaCijingulula to. Mpindyewu ncinyi aci leelù ewu? Zekàayi 14, wàkula bwà Dilwa Dyèndè.

Ne makàsà èndè neìmanè mu ditùkù adi pa mukùnà wà Olèvà, cyàkàbìdì, wùdì kumpàlà kwà Yelusàlèmà ku esètè awu, pa mukùnà wà Olèvà nepàpandikè bipesa bibidì lwà munkaci bitàngile ku esètè ne bitàngile ku wesètè, ne nekwikalè cibandabanda cinène menemene; . . . cyàbibidì cimwè cyà mukùnà aci necitentemunyiibwè citàngile ku nord, ne cyàbibidì . . . citàngile ku sud.

Nènku nenùnyeemenè ku cibandabanda cyà mikùnà; bwalu cibandabanda cyà mikùnà necikafikè too ne ku Azàlà: èyowa, nwènù nenùnyeemè, bu munwàkanyemà mu matùkù à dikanka dyà buloba mu matùkù à Uzìyà mfùmù wa Yudà: . . .

97 Dikwàbò dikanka dyà buloba didi dipundà buloba! Nwènù baswè kulonda Mufùndu kampànda mwaba ewu, mònaayi mu

mvensà mwi5 ewu, cidi cyàngaciibwa ne dipandika dyà Mukùna wà Olèvà didi ne cyà kufika ku dikanka dyà buloba, ne eci ncishindikibwe kùdì Yeshàayi 29.6 ne Bwàkabuulwibwà 16.9. Menemene! Ncinyi aci? Mupròfetà umweumwe awu wàkaakula bwà dilwa Dyèndè dyà kumpàla, wàkamòna Dilwa Dyèndè diibìdì. Mònaayi ne: “Bu mu matùkù à dikanka dyà buloba.” Nudi numòna cidi dikanka dyà buloba munkaci mwà kwenza anyi? Nudi numòna dîyì didyànjlila kwamba dyà bintu abi anyi?

...nènku MUKALENGE Nzambì webè neàlwe, ne bansantu bèndè bònsò pàmwè neebè.

Nènku nebyènzekè ne mu ditùkù adi, (àlèluuyàh) mu ditùkù adi, ne bukènkè kabwàkwikala butòòke to, anyi mifitù:

Kàdi necùkalè ditùkù dimwè ne...ditùkù dimwè diùkalà dimanya kùdì MUKALENGE, kadiyì muunya, kadiyì butùkù: kàdi nebyènzekè ne, ku ibaamulòlò nekwikalè bukènkè.

98 Éyì Nzambì!

Nekwikalè Bukènkè lwà ku ibaamulòlò,

Mupròfetà umweumwe awu, ne bantu mbampofò!
Dikòkiibwa didi cinyi? Tùbalàayi mvensà mikwàbò ndambù.

Nènku nenbyènzekè mu ditùkù adi, ne màyi à mwoyi neàpatukilè buludi mu Yelusalèma; cyàbibidì cyàwù citàngile ku mbù wa mubàndu, ne cyàbibidì. . . citàngile ku mbù wa ku mubwelu: mu muvù wà luuyà ne. . . muvù wà mashika ki mwikalàbi. (Èvànjeeliyò munkaci mwà kupàtuka; bònsò bàbidi beena Yudà ne bàà Bisàmbà byà bèndè.)

Nènku MUKALENGE neikalè mfùmù kumutù kwà. . . buloba: mu ditùkù adi, ne nekwikalè MUKALENGE umwe, ne dîna dyèndè nedùkale dimwè.

Nekwikalè Bukènkè lwà ku ibaamulòlò, (Cyà bushùwà!)

Njila wa ku Butùmbi nenùmupetè bushùwà;
Mu njila wa màyi, ke mùdì Bukènkè leelù ewu,
Bajiiikiibwe mu Dîna dyà mushinga mukolè dyà Yesù.

Bànà ne bakolè, nyingàlalaayi ku mpèkaatù yènù yònsò,

Nyumà Mwimpè neàbwele bushùwà;

Bukènkè bwà dilòlò bwàfikì,

Mbulelèlè ne Nzambì ne Kilstò bàdi umwe.

Nudi bamòne kutùkaadi aku anyi?

Matùngà àdi munkaci mwà kupanduluka,
Izalèlèlè ùdi munkaci mwà kutàbuluka,

Bimanyinu byàkadyànjlà baprófeta bèètù kwamba; (Dikanka dyà buloba adi kùdì bàà Bisàmbà byà bendè, ku ditùkù dyà ndekeelu.) Matùkù à bàà Bisàmbà byà bendè mmabala, majìngila kùdì ntátu; “Alukilaayi, Èyì nwènù bàdì batangàlake, kùdì bàà kwènù.”

⁹⁹ Nwènù bàvwà biipàciìbwe pambèlu abu, ne mishètà eyi myambula pa matempu mapyamàpyà, pàtukàayi muntwamu kumpàlà kwà lufù kunùkwàtalù. Nzambi mmuCishìndike. Nebiikale nànkù.

¹⁰⁰ Tùbuululàayi lwà mu Mufùndu mukwàbò mu Dipungila Dikùlukulu, Maalàkì nshapità mwi4, nènku tubalàayi nshapità mukesè mwi4 awu.

. . . mònaayi, ditùkù dilwalwa, dùikalà mwà kwosha bu cikùtù cyà kapyà; ne baditàmbishi bònsò abu, èyowà, . . . bònsò bàdì bènza maalu à lwonji abu, nebiikalè bu bisoosà: . . .

¹⁰¹ Mpindyewu, eci kí. . . Aci’s m’Maalàkì 3, uvwa dilwa dyà kumpàla, mpindyewu ke dilwa dyàlondà ndyòdì edi. Nànsha Docteur Scofield mwab’ewu, ncyà bushùwà ne ncyèna mpetangana nendè ku mèyi mu mèyi èndè mafùndà à kwinshì awu to, kàdi mmuditàèke mu mulongo mwaba ewu mu mùshindù mujaalàme. “Mudimu mutùma nawù Yone,” ku Maalàkì 3; ne: “Dilwa diibìdì dyà Kilistò,” ne Eliyà kumpàlà kwà abi. Èyò.

. . . baditàmbishi bònsò abu nebwòshikè, mùdì MUKALENGE wa bilwìlu wàmba, ne kadyàkubàshùla anyi muji anyi ditàmbà to. (Ìfernò wa “Cyendèlèlè” awu ùdì penyì dībà adi?)

Kàdi bwènù nwènù bàdì bàciina dinà dyànyì Dìbà dyà bwakànè nedijuukè ne bibilù byà dyondopa, dyondopa mu mapwâpwà àdì; . . . nenùpatukè, ne nenùtùmpikè; bu twànà twà ngombe mu cikùmbì.

Nènku nwènù nenùdyatè beena lwonji ku makàsà; . . . nebiikalè butù mwinshi mwà bidyacilu byà makàsà ènù mu ditùkù adi dīngenzà bwalu ebu, mmùdì MUKALENGE wa bilwìlu wàmba.

Vùlukàayi. . . mikenji yà musadidi wanyì Mòsà, yìmwàà mumutùminè dīyì. . . mu Holèbà bwà Izalèlèlà mujimà, . . . mèyì ne mikàndù ne cilumbulwidi.

¹⁰² Dilwa dyà Eliyà ndyòdì edi.

Mònaayi, Nènnùtùminè Eliyà muprófeta. . .

¹⁰³ Mufùndu wà ndekeelu wà Dipungila Dikùlukulu awu’s!

. . . Nènnùtùminè Eliyà muprófeta kumpàlà kwà dilwa dyà ditùkù dinène ne didì dikwàcisha bwòwà dyà MUKALENGE adi:

104 Mpindyewu, awu kàvwa mufwànyine kwikala Yone to. To. Nwamònu's, bàà pa buloba kabààkooshiibwa ne baakàne kabààkendela pa beena lwonji to. Nwamònu anyi? To, to.

*...kumpàlà kwà ditùkù dinène ne d'idi dikwàcisha
bwòwà dyà MUKALENGE:*

*Ne yèyè neàlujè myoyi yà baataatù kùdi b'ana, ne myoyi
yà b'ana kùdi baataatù, bwà ncìlu kutuuta buloba ne
mulawu to.*

105 Tàngilàayi b'impè ndudì y'idi naayi Nyumà Mw'impè, yà ne k'ayi Wùbwejakaja kulwa kùb'idi kwà Eliyà aku to. Maalàki 3, mmwambè ne: "M'onaayi, Ndi ntùma mùsànjeelà Wanyì kumpàlà Kw'anyi." Bàkakonka Yesù bwà Yone; Yèyè kwamba ne: "Bu nwènù mwà kucyàkidila, yèyè ewu ke wákamba mupròfètà ne: 'N'èntumè mùsànjeela Wanyì kumpàlà Kw'anyi.' Ewu ke Eliyà uvwa ne cyà kulwa awu's." Maalàki 3.

106 Tàngilàayi mùdi Mufundu ùcìfila cikùmbànàngàne ànu pyòpyopyò. Tàngilàayi cidi eci...bwà kuleeja...aba bàdi baswè kwitabuuja abu, aba bàdi baswè kum'ona abu. Nudi bavùlùka ne, Yesù wàkiimanyikila munkacì mwà Mufundu, bwalu citùpà cyàwù cìvwa cyule d'ibà adi, cìvwa cishààle bwà Dilwa Dyendè dyà cyàkàb'idi anyi? "Bwà kuyiisha cidimu cyà ngàsà cyà Mukalenge, kwondopa beena mwoyi mucibùlùke," ne kwimanayè; kabiyi "kutwàdila bàà Bisàmbà byà bendè cilumbulwidi" too ne ku Dilwa Dyendè diib'idi to.

107 Tàngilàayi Mufundu ewu ùdi wèndela p'ampwè ne wòwò awu. "Ne yèyè, Eliyà, neàlujè myoyi ya baataatù kùdi b'ana." (Mpindyewu wàkula bwà Maalàki 4, kanùcibwejàk'aji to, anyi Maalàki 3.) Yone, Eliyà, wàkalwa mu matùkù à kumpàlà kwà dilwa dyà kumpàlà dyà Kilistò awu, kwalujayè myoyi yà baataatù bankambwà bàà kale abu ku mukenji wà b'ana, mukenji mupyamùpyà.

108 Mpindyewu tàngilàayi. "Ne myoyi ya b'ana kùdi baataatù." Mu dilwa dyendè dyà diib'idi, mu matùkù à ndekeelu, yèyè udi wàluja cyàkàb'idi ku Diitabuuja dyà bàpostòlò. Nudi num'ona mùdi Mifundu y'ìnwàngana anyi?

109 Ki cìvwa ndekeelu wa Dipungila Dikùlukulu ncyòci aci, Dipungila Dikùlukulu. Mpindyewu tudi tum'ona ne kùdi Bukènkè ku ibaamulòòlò. Ncinyi Aci's? Ndusongo, lusongo lwà Muci wà ku Muk'una.

110 Ànu m'ung'ambì mu d'indà emu ne, tudi bap'icile mu m'angumba, ku (k'ì mmuci wà orange to) bu m'umv'wà mwàmbe mu d'indà emu, k'adi tudi bapete bimuma byà mb'omà, madimà à mp'usù, bintu bikwàbò byà mishindù y'onsò bivwà kabiyiku bu byà ku cibangidilu abi to n'ansha kakesè. K'adi paanyimà... KaCinùpicikù to. Ki Cyòci cilwalwà eci. Paanyimà p'aa m'angumba ònsò m'amanè kwenza w'awù mudimu, ka'avwa ne Bukènkè n'ansha bukesè to ànu kw'ine kw'onsò aku, nekwikalé

ditùkù dìdì kadìyì mwà kubiikidiibwa ne mmundaamuunyà anyì mbufùkù to.

111 Cìdìbo bènza ncinyì? Cìdìbo bènza ncinyì? Didimà dyà—dyà mpùsù dìdì dyènza cinyì ku mucì wa orange? Dìdì dyàngata mwoyi wà ku muji wà orange ùdì ùbànda ne ùwùnyangakaja kupicila ku didimà dyà mpùsù. Ke cìdì màngumba menzèle Dìyì dyà Nzambì ncyòcì aci, mmavwije Dìyì dyà Nzambì kadìciyi ne bwenzeji to ku bilèlè byàbò abi. Aci's cidi EMU MMÛDI NYUMÀ WA MUKALENGE WÀMBA. Mbatwàle madimà à mpùsù, à mbòmà, kî ng'orange to.

112 Kàdì mupròfetà wàkamba cinyì? Umweumwe wàkamba bwà kubala kwètù dilòlò edi awu ne: “Sànkaayi, Nwènù bânà bàà bakàji bàà Yelusàlemà, elàayi mbilà mikolè, bânà bàà bakàji bàà mu Siònà, bwalu Mfùmù webè ùdì ùlwa kùdì, mupòle ne wa mmwènekèlu mupwekèle, musòmbe pa mwànà wa mpundà mukàji,” mònayyi ne mupròfetà umweumwe awu wàkamba ne: “Nekùlwe cikondo cyà dibobeshiibwa.” Dìbà nditùmùibwe pa buloba bwà kubobesha mamuma. Bwà cinyì kacìvwakù mwà kuboba? Kakùvwakù mamuma à kubobesha to. Kàdì Mwoyi wùcidi ànu mutùngùnùke ne lwendu.

113 Cìdì cìpicila mu cimuma cyà mbòmà, cìkèba bwà kwikala didimà dyà orange, kwiya kujandula ne cìvwa cidyenze bulongolodi; cìvwa cimuma cyà mbòmà. Cyàkaya cyàkàbìdì, cyàkapàtuka cikondo aci cimuma cyà mpùsù. Kutungunukaci kàbìdì, kwandamukaci cìngà cintu. Kàdì ku ndekeelu, mu lusongo lwà mucì amu, ncishintùlùke cilwè orange wa mutwile mubìdì, mwìnè awu ùdì luseke orange luseke didimà dyà mpùsù; dimiinu disambakaja, cintu cinyangakaja; cilwè ku dinyangakaja, ciikàle ne mwoyi ku mucì umwèumwè awu; cizubu, “cyamba kuseeswisha Basungula.” Ncìfwànàngàne nè cimuma cyà orange, kàdì kaciyèna nànkù to.

114 “Kàdì nekwikalè Bukènkè,” pààkolàye kupita bulongolodi. Pàdìcì cipàtuka cipita bulongolodi, cìdì cìsàmpila cyàkàbìdì, necipatulè bimuma byà orange bu mùvwàcì pààkabwelàcì mu buloba, ne pashiishe nekwikalè Bukènkè.

115 Edi ndikòkiibwa kaayi edi; ncinyì cìdì munkaci mwà kwenzeka eci? Ciikàle munkaci mwà kuuja Dìyì dyà Nzambì. Kùdì bantèmù bàbìdì bàà mu Dipungila Dikùlukulu, bwà ne cyòcì eci cìvwa mwà kwenzeka.

116 Twàngatàayi Yone 14.12, wa Dipungila Dipyadìpyà, mmwà kambà Yesù.

... Ewu udi ungiitabuuya mêmè, byenzedi bìndì Mêmè ngenza yèyè neàbyènzè pèndè; ...

117 Kàbìdì, mu Luukà 17.22 too ne ku 30, Yèyè mmwàmbè ne:

... ànu mwàkadìbì mu matùkù à Lotà; kumpàlà kwà Sodoma, kwoshiibwayè, ke mwikalàbì kàbìdì ku

dyalukila dyà Mwàná wa muntu, *ditùkù* adi *pìikalà*
Mwàná wa muntu munkaci mvà kubuuludiibwa.

¹¹⁸ Kaa, tângilàayi ànu Mifùndu! “Mwàná wa muntu,” Yesù Kilistò umweumwe awu makèlèlè, leelù, too ne kashidi, kukolaci kushiya màngumba panyimà, kudyundaci kubwela mu lusongo lwà Muci awu. Ncinyi cyàkambàYe mu Yone 14, anyi 15? “Ditàmbà dyònsò didi munda Mwànyi, didi kadìyi dikwàma mamuma to, nedikoshiibwè ne kusònjiibwa, kwediibwadi mu kapyà ne kwoshiibwadi. Kadi ditàmbà dyònsò dyàkwàmà mamuma, nedisonjiibwè.”

¹¹⁹ Kaa, nekwikalè mvula mulelèlè wa dyàmbedi ne mushiishe mu matùkù à ndekeelu pa kasumbù kakesè kàälwà pàmwè Nendè pa mpundà mukesè ewu, kapwekèle ne kadipwekèshe, kakùyikù dik-...anyi dngumba to, bènda bèèla mbilà ne: “Hòzaanà kùdi Mfùmù udi ulwa mu Dìná dyà Mukalenge awu!” Mbwalu kaayi ebu leelù ewu? Ndikòkiibwa kaayi edi ku mukùnà?

¹²⁰ Ànu àbìdì àdì panshi aa, mèmè mwimàne ku cyambilu eci, bàakamba kùdi Nyumà Mwímpè ne: “Nekùlwe ditùkù dyàsàbo lupàndà kumpàla kwà nzùbu webè; nebàntentemunè ciibi cyà lupangu lwènbè. Pa nàнку awu, newùpicishe bwalu abu, kùyì ufika munda to.” Mèmè kumòna ciibi cyànyi cyà lupangu cipanda ne cisanganyiiibwa ku luseke lwà kakùna aku. Mèmè kumòna kakùnà mumpàla mwànyi amu, kajuomona kònsò, mabaya ne bikwàbò byònsò bilààle kuntu kwàka kùvwà cintu kampànda cibizàzè. Yèyè kwamba . . .

Mèmè e kutàngila, nènku kùvwà ka Ricky kakesè kàvwà kajuuke kuntwaku ne kajuomòne ciibi cyà lupangu aci, kenzè nàнку. Mèmè ne: “Bwà cinyi kùvwakù mungambile?” Yèyè kungandamuna ne kapeejà, ke kukèngelabi bwà mèmè kumutuuta. Nènku pààkenzekàbi nàнку, mèmè kwamba ne: “Ncitu mulwangana to kacya ànu ngùmuka mu cyalu cyà mvita yà mankomù, kadi ndi muswè ànu bwà ùmanyè,” kadi mèmè kumwabisha dìmwè. Nènku pangàkamupyàndà mu malaba, mèmè kumujuula cyàkàbìdì e kumupyànda cyàkàbìdì mu malaba. Mèmè kumujuula, misangu yisàtù anyi yinaayi, pashiishe kumuzàka lwà ku kakùnà aku. Ki dîbà adi mèmè kuya kuntwaku, ki mèmè kwamba ne: “Aci kî ncimpè to.” Ki mèmè kumujuula kadi kumulabula ku cyanza, kwamba ne: “Ncyèna mukufiikile munda to, kadi ndi muswè ànu bwà ùmanyè ne kwèna mwà kwakula naanyi mùshindù awu to.”

Ne pashiishe pàngàakakùdimukà ne kwalukila, Nyumà Mwímpè ùvwà mwimàne ku ciibi cyà lupangu aku, yèyè ne: “Mpindyewu cingulukà eci. Pàashiibwà lupàndà alu, kùdimuka ùye ku wesètè.”

Mukàndà ewu, byònsò bìndì naabi dijinga,
 Mukàndà Ewu m’Mukenji mwímpè,

Njila udi uleeja bwà mêmè kucinguluka ntàtu.
Amen!

121 Ne Mukàndà awu n'Dîyì, ne Dîyì adi didi Nzambì. Cìngùlukàayi ntàtu yènù, Dyòdi ke dyànwàmbila cìdi cìkèngela bwà kwenza.

122 Kùkaadi bidimu bisàtù mvwa múmvwe mulundà wanyì wàmba, mutàngidi wa maalu à micì ne nzùbu wa cimenga, mmusòmbèle mu ntàntà mukesè naanyì, wènda ùbweja lupàndà panshi. Mêmè kupàtuka kwaka kwamba ne: “Mbwalu kaayi ebu’s, Mud?” Mwànà wa Mukalenge King, mulundà wanyì sungasunga.

Yèyè ne: “Billy, nebàalabajè njila ewu.”

123 Nwènù bònsò’s nudi bavùlùke. Mêmè kwamba ne: “Cìdi mwà kwikala cilamba aci.” Mêmè kwambila Mwanèètù Wood, kwamba ne: “Ikala mulamè lupangu lwèbè. Pàmwàpa cilamba aci necìpicilè lwà mwab’ewu, anyì cintu kampànda.” Bààkabùndulula njila awu; màdyòtò, mabwe, biimansa myaba yònsò. Ki yèyè kwamba. . . Mêmè kwamba ne: “Ikala mulamè lupangu lwèbè.” Pashiishe dîbà dîmvwà. . .

Mukalenge King kungambila ne aci necyènzekè.

124 Mêmè kubwela, kwambila mukàjàanyì uvwa musòmbè mwaba awu ne: “Munanga wanyì, kùdi cintu kampànda cifùnda pa bwalu abu. Ng’EMU MMÛDÌ MUKALENGE WÀMBA, mwaba kampànda.”

125 Mêmè kubwela e kwangata mukàndà wànyì, kutàpamù dîsù, ne cìvwa cyàmba ne: “Nebyènzekè nè. . .” Paanyimà pàà bidimu mwandamukùlù!

126 Pashiishe ndi mwenzè ànu ncitàngila, mêmè kwamba ne: “Dîbà dyàkànyì mpindyewu, munanga wanyì, tudi ne cyà kukùdimuka kuya ku wesètè.”

127 Matùkù àbìdi paanyimà pàà cyòci aci, mêmè mwimàne mu cibambalu lwà pa dîbà dikùmi jaajaaja mu dindà kampànda, mêmè kubwela mu Nyumà wa Nzambì. Mêmè e kumòna musùmbà mukesè wà nkuci munkaci mwà kubùuka, mêmè e kutàngila tunyuunyi tukesè atu’s. Nudi bacìvùlùke. Mêmè kumòna Banjèlò mwandamutekète mu mmwènekèlu wa cipaapu cyà musàkà, balwa lùbilu batàngile kùndi. Yèyè kwamba ne: “Kùdimukà ùye ku wesètè, nda ku Tucson, newikalè mu ntàntà wa kilòmèètà makumi àsambòmbò ne yìnaayi lwà ku nord-est. Ne newikalè munkaci mwà kuditùla mpoopu,” anyì ntambwe-dishinda, mùdìbo bàcìbìkila kuntwaku, “ku bilàmbà byèbè.”

128 Mwanèètù Fred Sothmann, udi musòmbè pààpa wàwa muntàngile mpindyewu mene, ùvwapù mu dindà adi. Nkààvwa mucipwe nè mwoyi.

129 Mêmè kwamba ne: “Dikùbàkùbà kudilàdi bu dikanka dyà buloba, dyàkanyùkusha pabwìpì ne byònsò bivwàku mu citupà

cyà buloba aci. Ncyèna mmòna mùdì muntu mufwànyine kupànduka ku cyôci aci to.” Mémè kuumvwa bwôwà bwà kacya. Mvwa mwimàne ku Phoenix, nwênù bônso bàdi munkaci mwà kutèèleja dilòlò edi nudi mwà kumfidila bujaadiki. Mvwa muyiishe pa diyiisha edi dyà nè: *Bakalenge, Tudi Dìbà Kaayi?* “Tudi penyì?” Mémè kuya ku wesètè. Bààbúngì bàà kunùdi kaaba aka bàdi nè mukàbà wà mēyì awu, bààbúngì bàà kunùdi kaaba aka bàvwa bŭmvwe cyambiibwa, cidimu cijimà anyì bipìte apu kumpalà kwà kwenzekaci.

¹³⁰ Mémè kuya ku wesètè, ngènda ndikonka civwà mwà kwenzeka. Dìngà ditùkù mémè kupeta dibiiikila dyà kùdi Mukalenge. Mémè kwambila mukàjàànyì, kwamba nè: “Munanga wanyì, ndi...pàmwàpa mudimu wanyì wàjikì.” Ncivwa mumanyè to. Mémè kwamba ne: “Ndi...Nzambi, pàmwàpa Nzambi wàjikijì naanyi mpindyewu ne nèngàalukilè Kumbèlu. Ndaaku nùkapetàngànè nè Billy, wàngate bânà. Nzambi neatangilè bwalu bwèbè, mu mùshindù kampànda. Tùngùnukà ne kwikala ne nsòmbelu wa lulamatu kùdi Nzambi. Ùtábaleelè bwà bânà bàjikijè tulaasà, ùbàkolèshà mu mibelu yà Nzambi.”

Yèyè ne: “Bill, kwèna—kwèna mumanyè aci ní ncilelèlè to.”

Mémè kwamba ne: “To. Kàdi muntu kèena mwà kupànduka ku cyôci aci to.”

¹³¹ Dindà kampànda Mukalenge kumbiishayè ku tulù, kwambayè ne: “Juukà ùkabwelè ku Sabino Canyon kwàka.” Mémè kwangata dibèji ne Bible wanyì.

Mukàjàànyì kwambayè ne: “Uyààya kwèpì?”

Mémè ne: “Ncyèna mumanyè to. Nénkwambilè pàngàalukilà.”

¹³² Mémè kubànda mu lupongo amu, kubànda too ne kuulu kùvwà mikankù yibùuka yitwa eku ne eku aku. Mvwa mbandila kashà kampànda kiimàne mwaba awu. Mémè kutwà binù panshi bwà kusambila, ne kwela byanza byànyì muulu, ke Mwelè wà mvità kummatawù mu cyanza. Mémè kukènzakana. Mémè kudyàmbidila ne: “Ncinyì ciinè aci? Ncyèna mujimije lungènyì to. S’ki Mwelè wà mvità ewu mu cyanza cyànyì; ùpenya, ùbàlakana, ùkenkela mu díbà.” Mémè kwamba ne: “Mpindyewu, kakwèna bantu mu ntàntà wa kilòmèètà pabwìpì naanyi apa to, lwà kuulu mu lupòngò emu. Mpenyì pàdiwu mwà kufùmina’s?”

Mémè kuumvwa Dìyì, dyàmba ne: “Kì Mwelè wà mvità wà Mfùmù ngwòwò awu.”

Mémè ne: “Mfùmù ùdi ùvwija muntu mubàndi wa pa kàbalù ne mwelè wà mvità.”

¹³³ Yèyè, Dìyì adi, kwalukiladi, dyàmba ne: “Kì mmwelè wà mvità wà mfùmù kampànda to, kàdi: ‘Mwelè wà mvità wà Mfùmù awu,’ Dìyì dyà Mukalenge.” Yèyè kwamba ne: “Kùciinyi

nànsha. Cìdi ànu Nkòkelu Mwisâtù. Ncishìndiki cyà mudimu wèbè wà bwambi.”

¹³⁴ Mvwa nya kalemba nè mulundà wanyi kampànda, nciyi mumanyè cìvwà ne cyà kwenzeka to.

Ke muntu kampànda kumbiikilayè, ewu uvwa undyùla bwà fòtò wa Mwanjèlò wa Mukalenge, mwine uvwa mumukwàte awu. Bivwa bikèngela nye ku Houston bwà mwanèndè wa balùme, bwalu ùvwa ùya mu mulongo wà bafùndila lufù ne ùvwa ne cyà kushipiibwa mu matùkù makesè. Ke kutwilanganayè naanyi muntwamu ne kungeelayè mabòko ku nshìngù, wàmba ne: “Elà meeji tùng, muntu mwine ùmvwà ndyùla mmulwè bwà kusùngila mwanàanyi wa balùme mulela umwe’s wè!” Cisumbù cyà bambulwishi bàà bantu ncimpèshe cìdibo bàbiikila ne oscar, anyi mwónsò munùdi baswè kucibiikila amu, bwà disùngila dyà mwoyi kampànda.

¹³⁵ Pashiishe twètù kwalukila, mèmè kubànda ku mukùnà bwà kuya kalemba nyama. Mwaba awu, mèmè ne Mwanèètù Fred, dindà kampànda pàngàakapàtukà, nènku mèmè—mèmè nkààvwa mumanè kupeta wanyi ngulube wa diitu, ki mèmè kutàngila e kumòna mwaba mwine ùvwàyi miyìlè awu. Mèmè kwamba ne: “Mwanèètù Fred, nda pa mukùnà wàwa kumpàla kwà dìbà mu dindà mpindyewu, pàdi butùkù bwàmba kucyà apu, nènku mèmè nemfikè pa mukwàbò wàwa. Ncyàkwasa ngulube to, ncyà kumushipa to. Kàdi yòyi milwile lwà elu luseke, cisumbù cyà nyama aci, nenkumè cingoma kumpàla kwàyi dìbà adi kuyinyeemesha bwà kuyipingaja cyànyimà.”

¹³⁶ Mwanèètù Fred kupàtuka kuyayè kuntwaku ne kakùvwa ngulube ya cisuku to. Yèyè kunkùpa cyanza ne mèmè kumòna. Mèmè kupweka mu lupòngò kampànda, ndambù wa biinà binène, dìbà dicìvwa ànu dicìbàndilakù. Mèmè kunyùngulukila luseke lukwàbò lwà kakùnà, nciyi ngèèla meeji ku bwalu nànsha bùmwe pa bìdì bitàngila bipròfeta to. Mèmè kusòmbela panshì, mwindile, ngiikisha; mèmè kudyàmbidila ne: “Cìdi cifikile ngulube ayi ncinyi?”

¹³⁷ Mèmè kwambula cyànyi...Kusòmba panshì mùtù ba-Indiens bàsòmba amu, nudi bamanyè, bavunge mikòlò’s. Mèmè kutàngila ku mukòlò wànyi wà mùpanu, kùvwa ntambwe-dishindà. Mèmè e kumutùùla. Ki mèmè kwamba ne: “Ebu bwalu’s mbwà dikèma! S’ki mèmè ewu, mu ntàntà wa kilòmèètà mitwè ku makumi àsambòmbò ne yinaayi ku nord-est wa Tucson. Ki mwanàanyi wa balùme mutekète Joseph udi musòmba kwaka munkaci mwà kungindila ewu.” Nènku ndi mwenze ànu mbanga kutàngila, mèmè kumòna cisumbù cyà ngulube cìpàtuka mu ntàntà wa mètres matwè ku nkàmà citèèmà nè mwaba wùmvwà awu, pa mukùnà kampànda, Mèmè kwela ntambwe-dishindà panshì. Mèmè kwamba ne: “Nenkayikwàtè. Nènye kangata Mwanèètù Fred, ne nèndembelejè katùpà kàà

dibèji kuulu eku bwà kumanyisha njila wa kuyiila, ku mucì wà ocotillo mwab'ewu, nènku netùpete Mwanèètù Fred.”

¹³⁸ Ki mémè kubànda mukùna awu, ngènda nyeema ne mwànyì mwònsò ku luseke lukwàbò alu. Dyàkàmwè, mémè kudyàmbidila ne muntu kampànda mmungàsè cingoma. Kacya ncituku mwanji kuumvwa dikùbàkùbà dyà mùshindù awu to; kunyùkushadi ditùnga dijimà. Nènku, pààkenzàdi nànkù, ke Banjèlo mwandamutekète aba biimàne kumpàlà kwànyì mu cisumbù.

¹³⁹ Mémè kutuutakeena ne Mwanèètù Fred ne bakwàbò, paanyimà ndambù. Yèyè ne: “Cìvwa ncinyì?”

Mémè kwamba ne: “Cìvwa ncyòci aci.”

“Ciwènza ncinyì?”

¹⁴⁰ “Kwalukila kumbèlu. Bwalu, EMU MMÙDÌ MUKALENGE WÀMBA, maalu masokoka mwandamutekète àdì masokoka mu Bible bidimu byònsò ebi awu, màngumba aa ne bikwàbò byònsò ebi, Nzambi neàtùkàngwilè maalu masokoka mwandamutekète awu mu Bitampì Mwandamutekète.”

¹⁴¹ Kùvwa cijèngù cìvwa cibànda cìfùmina pa buloba aci, cyenze mùtù difwima didivùnga amu's. PàkenzàCi nànkù, Cyàkabànda buludì too ne ku mukùna, kubanga kwenza cijèngù citàngile ku wesètè, kùvwaCi cilwilè aku. Maalu à mamanya kuCisangànwù paanyimà pàà katanci, mu ntàntà wa kilòmèetà makùmi ànaayi ne mwandamukùlù mu butumbùke ne bucyàmà bwà kilòmèetà makùmi ànaayi, ànu menemene mu cijèngù cyà cipaapu cyà musàkà aci.

¹⁴² Nènku ditùkù adi, mvwa mwimàne mwaba awu, mémè kukudimuna fòtò awu ku dyàbalùme, kàdi's ke Yesù ànu mùvwàYe mu Bikondo Mwandamutekète byà Èkèleeziyà, ne kafulu katòòke ku mutù, kàleeja Bunzambi bwà Kumutù kwà byònsò. Yèyè ùdi Alpha ne Omega; Yèyè ke wa Kumpàla ne wa Ndekeelu; Yèyè's ke Mulumbulwishi wa Kumutù kwà byònsò wa Cyendèlèlè cyònsò, mwimanè mwaba awu bwà kushindika Mukenji wà dībà edi. Nènku nekwikalè Bukènkè lwà ku ibaamulòòlò! Byònsò abi bìdi bwà bwalu kaayi? Cìvwa ncinyì?

¹⁴³ Mémè kuya ku wesètè. Pa mukùna ùmwèùmwe awu, mpicila kuulu aku nè Banks Wood kuntwaku, kwamba ne: “Ela dibwe muulu. Ambila Mukalenge Wood nè: ‘EMU MMÙDÌ MUKALENGE WÀMBA, neumonè Butumbi bwà Nzambi.’”

¹⁴⁴ Ditùkù dyàkalondà adi, mwimàne mwaba awu, mvùnda kupweka e kutayisha mikùna ayi. Mbwebwe yàkakòsa nsongo lwà micì, too ne mu centimètres mitwè ku makumi citèemà anyì mètre mujimà ne byà mu njila kumutù kwànyì. E kwenza bikùminà bisàtù binène, ke bânà bèètù kulwàbò lùbilu. Kùvwa bantu batwè ku dikùmi ne bàtaanu biimàne mwaba awu,

bayiishi ne bikwàbò byònsò. “Cìvwa ncinyi?” Yéyè kwamba ne: “Cìvwa ncinyi?”

Mémè kwamba ne: “Cilumbulwidi cìdi cìtuuta Côte Ouest.”

¹⁴⁵ Matùkù matwè ku àbìdì paanyimà pàà cyòci aci, dikanka dyà buloba adi kwambadì kutùkija Alaska. Ebu m’Bukênkè kaayi ebu pa Mukùnà wà Sunset mu Diitu dyà Coronado mu Arizona? Eci ncintu cyà pabwàci kaayi eci cidi cyenzèke kuntwaku, bwà bantu kuyabò ku esètè bùumukila ku wesètè, bènda bàngula mabwe àvwà panshì apu mwaba ùvwàDi ditùtè awu’s? Nènku dyònsò dyàkùdìwu, dibwe ne dibwe dyònsò, divwa ne matumba àsàtù pambidi pàadi, divwàDi dilamùkekù. (Bàsàtù abu àdi Umwe.) Mmatèèkìibwe pa bibàsa, bu bilaminyi byà mabèji, mu ditùnga dijimà emu. Ncintu cyà pabwàci kaayi eci pa Mukùnà wà Sunset mu Diitu dyà Coronado?

¹⁴⁶ Junior Jackson udi munkaci mwà kuteeleja, nudi bavùlùke cilòòtà cìvwaye mulòòte cìmvwà mumvwije aci anyi: “ngènda nya mutàngile kùyaaya dība kabwela?” Nènku cyòci eci cyàkenzeka pa Mukùnà wà “Sunset” apu. Ncikondo cyà ìbaamulòòlò, cikondo cyà dibwela dyà dībà. Mukenji wà dibwela dyà dībà kupicila mu dibwela dyà bwalu-bulonda, dibwela dyà dīyī dyà cipròfetà, èyowà’s, munkaci mwà kuula. Nènku nekwikalè Bukênkè mu cikondo cyà dilòòlò, pa Mukùnà wà Sunset mu Diitu dyà Coronado, ntàntà wa kilòmèètà makumi àsambòmbò ne yinaayi ku nord wa Tucson. Tàngilàayi mu kartà kàà buloba ne nùmonè ní nDusongo lwà Sunset kuntwaku. Ke mwaba menemene ùvwàci cyenzèkèle. Ncivwa mucimanyè to too ne ditùkù adi.

¹⁴⁷ Byònsò bìdì...Abi kabyàdyàkufwàku to. Bidi ànu bìDivùngulula ku musangu ne ku musangu. Kuumukila ku cintu mene cyàkenzeka aci, too ne ku fòtò udi Yesù mwimàne mwaba ewu mutàngile kutùdi; nènku mpindyewu menemene pa Mukùnà wà Sunset, ne Bukênkè bwà dibwela dyà dībà. Bukênkè bwà dilòòlò bwáfiki, Nzambi mwikàle ùDishindikà. Ncinyi aci? Mbyenzedi bìdì bileeja ne Nzambi ne Kilistò bàdi umwe. Cyà “citòòke,” mbanganyi bàkaadiku bacimòne, kafulu kàà nsuki mitòòke kumutù Kwèndè, bu mutwàkùlù mu Bwàkabuulwibwà 1? Nwamònu’s, Buzambì bwà Kumutù kwà bwònsò, Bukòokeshi bwàa Kumutù kwà bwònsò; kakwèna dīyī dikwàbò nànsha òmwè, nzambi mukwàbò nànsha umwe, cintu cikwàbò nànsha cìmwè’s! “Munda Mwèndè mmudi musòmbèle kaabujimà kàà Buzambì mu ciikadilu cyà mubidi.” Banjèlò Bòbò biine ke bàvwa kafulu Kèndè. Amen.

¹⁴⁸ Cìdi cyenzèke pa Mukùnà wà Sunset ncinyi? Nzambi mwikàle ùshindikà Dīyī Dyèndè. Ke cìdi mutooyi wònsò ewu wàmba ncyòci aci. Mònaayi ne, Nzambi ùdi munkaci mwà kuuja cyàkàbìdì Dīyī Dyèndè dilaya, dyà Bwàkabuulwibwà 10.1 too ne ku 7: “Nènku mu matùkù à dyela dyà mpungi wa

Mukenji wà mwanjèlò wa mwandamutekète, bwalu busokoka bwà Nzambì bùdi ne cyà kujika.” Bwalu busokoka busokòmè bwà Bwàkabuulwibwà 10.1 too ne ku 7, Mukenji wà ndekeelu bwà cikondo cyà ndekeelu cyà èkèleeziyà. Cidi cyùja ànu lahalaha, mu eci cikondo, Luukà Munsantu 17.30: “Ditùkù dyàbuuludiibwà Mwànà wa muntu.”

¹⁴⁹ “Nènku nekùjuukè bapròfeta bàà mashimi ne ba-Kilistò bàà mashimi, bàleeja bimanyinu binène ne maalu à kukema, mu mùshindù wà bifwànyine kuseeswisha Basungula bu ne bìvwa mwà kwenzeka.” Bantu bàcidi ànu mu dyela dyà mpatà. Nènku, ànu bu pa ciibidilu, èkèleeziyà pèndè mbimupita mutù.

¹⁵⁰ Nànsha maalu à mamanya, mu Tucson mwònsò amu, bàdi munkaci mwà kufùnda tumaalu batwèla mu cibèjibeji. Kule kwàka lwà pa Mont Lemmon, byamù binène byà mpòngòlòfwatù abi kabìvwa biCimòne pàvwàci cibànda apu cyùmukila lwà kutùvwà biimànyine aku to; cyènda cibànda citàngile ku Wesètè, munkaci mwà kuleeja ne cikondo ncimanè kujika. Cidi mwà kuya ànu katùpà kakesè ndambù kuntwaku; cidi ku Côte Ouest. Cilumbulwidi ncilengè ànu mu njila mene wàkayàci awu. Cyènda cibànda citàngile ku Phoenix ànu munkaci mwà kukòsolola, mu Prescott ne kukòsolola mikùnà citàngile ku Côte Ouest, cyènda ànu citùngùnùke cikabwela mu... Bàvwa munkaci mwà kuya penyì? Ànu buludi too ne mu Alaska, ne cidi cituuta makùbàkùbà, cyènda cìya citàngile ànu luseke alu.

¹⁵¹ Nènku nzùbu yà dijoojela ne bònsò mu Tucson bàcidi ànu bàkonka, bukèbikebi bwà maalu à mamanya bùdi bùteeta bwà kujandula ne ncinyì. Kuulu menemene kùdi kakùyì mwà kwikala citeleela, mafwima, anyì ní ncinyi kuulu kwàka to. “Cidi cyenzè bwalu abu ncinyì? Cidi penyì?” Ke bòbò abu munkaci mwà kukùmakana mitù bwà Bukènkè butàmbe-mfùkilu abu bùvwa bulembèlèle mu dyulu ànu bu dîbà dîvwa beena Meeji balwè bènda bàlonda Mùtootò adi, bàmba ne: “Mfùmù wa beena Yudà udi mulediibwe awu Ûdi penyì?” Cìvwa ncinyì? Nzambì munkaci mwà kuuja Dìyì Dyèndè ne: “Nènku nekujuuke mùtootò mu Yakòbò.”

¹⁵² Nè Nzambì wa mu Dyulu mmulayè ne dîbà dyà dilòlòlò dîvwa mwà kwikala ne Makènkè à dilòlòlò. Kùkaadi bidimu bisàtù bwalu busokoka ebu bùvwa cipròfeta: “Tudi dîbà kaayi, Mukalenge?” Kàdi mpindyewu mbwalu-bulonda. Mbumanè kupita. Mulayi mmuule. Tudi dîbà kaayi, mukalenge, nè ndikòkiiibwa kaayi edi’s? Nzambì munkaci mwà kukùmbaja Dìyì Dyèndè! Yèyè ùdi umweumwe awu makèèlèlè, leelù, too ne kashidi.

Tùsambilàayi.

¹⁵³ Nzambì Munanga, ndi mulamè bantu ntàntà mule, mutàmba bule kupita mmùmvwà mwelèlè nè meeji. Ndi ndòmba, Nzambì, bwà ne cintu kampànda ncyambiibwe anyì cyènjiilbwè ciikalà

mwà kufikisha bantu myaba yònsò ku dyumvwa. Ne pa kumòna ne kumvwa nènku mbafwànyine kwitabuuja ne Wèwè udi Kilistò mulelèlà, ne Méyì àdi munkaci mwà kushindikiibwa awu ke dishindika dyà Dîyì Dyèndè diikàle dipwàngàne ne diikàle dyùla mu movù Wàdi.

¹⁵⁴ Mpindyewu, Mukalenge Yesù, ku Méyì Èbè Sungasunga, Wèwè wákamba ne buloba nebwikalè mu ngiikàdilù wa Sodomà. Tudi bamanyè aci, tudi mwà kucitàngila. Ne Wèwè wákamba, mu ditùkù adi ne: “Ànu mwàkadìbi mu Sodomà amu.” Kùvwa baamisànjeelà bàsàtù batùmiibwe kùdi bàà Bisàmbà byà bendè ne beena Ebèlù. Nènku umwe wabò, uvwa Nzambi Yèyè mwinè awu, Mwànà wa muntu, wàkaDibuulula mu mmwènekelu wa muntu ne kwenza cishimà, mu mùshindù wà ne kwambila nè Abraham civwà Sarah wènza paanyimà Pèndè mu ntentà.

¹⁵⁵ Wèwè wákamba ne necyènzekè cyàkàbìdi piikalà buloba bujimà bwà bàà Bisàmbà byà bendè mwà kwikala mu ngiikàdilù wa Sodomà. Nènku ke twètù aba, Mukalenge. Bipròfetà bikwàbò biikàle bishindika cintu cimwècimwè aci, cyà ditùma Eliyà mu matùkù à ndekeelu, Nyumà wa Eliyà pa buloba, bwà kwaluja myoyi wà baataatù, anyi, “kwaluja bânà kùdi baataatù.” Nènku ndi ndòmba, Nzambi, bwà dîbà edi Ûshindikèku Dîyì Dyèbè ne, Wèwè udi umweumwe awu makèlèlè, leelù, too ne kashidi. Enzàku nànkù, Taatù. Mbèèbè Wèwè bònsò. Ndi ndòmba bwà Wèwè kufilaku mabènesha aa ne kushindika bìdi byambiibwe, bwà Butumbì bwà Nzambi. Mu Dînà dyà Yesù Kilistò. Amen.

¹⁵⁶ Bwà kwamba dîyì, aci's mbwalu bwà muntu; kushindika dîyì, aci mbwalu bwà Nzambi. Kwamba cintu kampànda, ncintu pa bule; bwà Nzambi kucyènza, ncìngà cintu. Nzambi kàtu dìjinga ne muumvwiji nànsha umwe to; Yèyè udi wenza dyumvwija Dyèndè Yèyè mwinè.

¹⁵⁷ Mpindyewu tukàadi pabwîpì ne kwenza mulongo wà babèèdì, bwà kusambidila babèèdì, bu Nzambi mwà kwanyisha. Nènku tudi bamanyè ne kakwèna muntu nànsha umwe, muntu mulùme nànsha umwe, muntu mukàji nànsha umwe, muntu nànsha umwe, mwanjèlò nànsha umwe, udi mwà kukwondopa, bwalu Nzambi ùkaadi mumanè kucyènza. Yèyè wàkenza didilongolola adi, cintu cimwèpelè cidì cikèngela wèwè kwenza nkucyàkidila.

¹⁵⁸ Kakwèna muntu nànsha umwe, mwanjèlò nànsha umwe, cintu nànsha cimwè, nànsha mene Nzambi, Yèyè mwine, udi mwà kukufwila luse bwà mpèkaatù yèbè to. Cikaadi cimana kwenza. Yesù wàkacyènza ku Nkùrusè. Kàdi kacyàdyàkukutancishakù ku cintu nànsha cimwè, anyi kukukwàcishakù ku cintu nànsha cimwè paudì kùyì mucitàbe to. Nwamònu anyi?

¹⁵⁹ Cintu cimwèpelè cidì mwà kwenjiibwa, mmèyì matùmà àdi mafidiibwe kùdi Nzambi, bwà beena kwitabuuja kutentekela

babèèdi byanza. Aci ncyenzèke munda mwà bikondo ne mmbenzè nàнку, ku matàbuluja. Ne bôbô mbacibìikile ne: “Nzambì.”

¹⁶⁰ Abraham wàkamòna bimanyinu byàbùngì. Kàdi kwàkalwa cikondo cyàkamònà Abraham cimanyinu cyèndè cyà ndekeelu, pabwìpì menemene ne Sodomà kwoshiibwayè, ne ùvwa n’Nzambì ùDimwènesha mu mmwènekeli wa muntu. Nudi nwitabuuja nàнку anyi? Yesù wàkamba ne necyenzèke cyàkàbìdi anyi?

¹⁶¹ Mpindyewu, mbanganyì mwab’ewu . . . Nè kùdi cisanji cìfika aku, anyì ku nshinga yà tèlefonè mu ditunga dijimà, panwikalè batungùnùke ànu ne kutèeleja, dilongòlòlaayi mpindyewu bwà disambila, ikàlaayi nusambila, ne nwènù bàdi ne mishwalà eyi kaaba aka abu. Mpindyewu, ncyèna mwà kwambila Nzambì cyà dyanza to. To, byàyiila ne kule mene byà kuteeta kwenza nàнку abi’s. Yèyè mmudìshikàmìne; Yèyè ùdi wènza cìdìYe muswè kwenza aci. Ndi mwà kutùmikila ànu cyanàànà ne kwamba ànu cìdìYe Yèyè wàmba aci.

¹⁶² Nè mpindyewu mbiimàne ku bimanu, mbalamàkàne, mbapàtākàne. Ndi ndìkonka ní tudiku bafwànyine kulòmba Nzambì beeyèmene pa mèyi aa ne: “Edi ndikòkiibwa kaayi edi?” Bu Nzambì mwà kukwàta cyàkàbìdi mudimu munkacì mwètù (kùdi mwà kwikala beenyi kaaba aka), ne kukwàta mudimu munkacì mwètù ne kuleeja mpàlà Wendè mubèneshiibwè munkacì mwètù, kuleeja ne Nyumà Wendè ùdi kaaba aka, kuleeja ne Yèyè ùdi umweumwe awu makèlèlè, leelù, too ne kashidi, bwà ne yònsò wa kutùdi (paanyimà pàà Mayiisha àbìdì à makàndà aa) wàmòna mwà kuciitabuuja ne cidi nàнку anyi? Udikù mwà kucyènza anyi? Eyo.

¹⁶³ Nènku, pamutù pàà kubiikila mulongo wà babèèdi; kùdi luuyà, bantu bapàtākàne, biimàne beeyèmene ku cimanu. Ndi nkènzakana mùshindù ewu, bwà kubiikila mulongo wànyì wà babèèdi, kanwèna bafwànyine kucyènza to; tàngilàayi, biimàne mwaba awu. Ndi mwà kuwùbiikila mùshindù ewu anyi? Babèèdi bèènù, tulàalù twà babèèdi, bintu bikwàbò byònsò, bilàale; kwènà mwà kucyènza to. Pa nàнку sòmba mwaba wùdi awu, ne itàbùùjà Nzambì. Wèwè bushùwà ne kartà kàà disambila, shààla mukàkwàte, nebiikalè bimpè. Netùfike kùdi pawikalà muswè kupicila mu mulongo kampànda. Kàdi kabyèna bikèngela bwà wèwè kupicila mu mulongo to.

¹⁶⁴ Mukalenge Shepherd awu, dilòlòlò dyà dyàlumingu dyàshàadi edi, kàtu mulweku mu mulongo nànsha ùmwè to. Ncyèna—ncyèna ngèela meeji ne yèyè ùvwa nè kartà kàà disambila to. Mukalenge Shepherd ùdi mwab’ewu dilòlòlò edi anyi? Yèyè awu udi penyi? Ùdi apa anyi? Ùdi paanyimà. Uvwa ne kartà kàà disambila anyi, Mukalenge Shepherd? Kùvwa naakù anyi? Yèyè kàvwa naakù to. Mmusòmbè cyàkàbìdi mwaba

awu, dilòòlò edi. M'mwaba mwîmpè wà kwikala, Mwanèètù Shepherd.

¹⁶⁵ Kabîyî ànu bikèngela wêwè kwikalamù to, kàdi ikalà wêwè ànu ne diitabuuja. Bwalu, vùlukaàyi ne, mukàji mutekète wàkalenge civwàlù Cyèndè ne Wàkacyùmvwà. Ne Yèyè ùdi umweumwe awu makèlèlèlè, leelù, too ne kashidi. Nè mukàndà mutùmina beena Ebèlù, mu Dipungila Dipyadipyà, mmwambè ne Yèyè ùdi Mwakwidi Munène dilòòlò edi udi mwà “kulengiibwa kùdi dyumvwà dyà mateketa èbè.” Udi witabuuja aci anyi? Ikàlà ne diitabuuja pa dîbà adi! KùCyèdiku mpatà to. ÛCitàbùùjè, ne necyenzeke. Udi mwà kupeta cyùdi—cyùdi mulòmbè aci, bu wêwè mwà kuCìitabuuja. Kàdi bikèngela ùCitàbùùjè. Nudi baswè kucyènza anyi? Nwènú bònsò nenùCitàbùùjè anyi? Mbanganyi bìikalà mwà kuCìitabuuja mpindyewu? Nzambi ànùbènèshè.

¹⁶⁶ Ncyèna mumanyè ne nganyi mwinè awu to. Ncyèna mumanyè muntu nànsha umwe wa kunùdi to. Kí mbwalu bwànyi bwà kumanya nànsha umwe wa kunùdi to. Mbwalu bwà Nzambi bwà kumanya maalù aa. Kàdi Yèyè neàcyènzè bu wêwè mwà kuCìitabuuja. Udi muswè kuCìitabuuja mpindyewu anyi?

¹⁶⁷ Mpindyewu, Nzambi Munanga, ncyà bushùwà ne katwèna musùmbà wa beena Kilistò bàà mamiinu masopakaja to, kabivwa bikèngela twètù kwikala nànkù to, bantu kampànda bàà bèngeleka ne bàlaaba maanyi. Wêwè kwèna ne wa mùshindù awu to, Mukalenge. Udi ne beena kwitabuuja bakàyàbàle. Bwikadi mene bwà Nzambi bùdi bùteemesha kapyà mu mwoyi wà muntu. Bu Abraham, yèyè wàkiitabuuja Nzambi. Wêwè kuDimanyisha kùdiye, pashiishe Wêwè kumumwènekela ne kwenza cimanyinu kampànda, ne yèyè kuKwitabuuja. Wàkaaluja mubidi wèndè ku bunsongà, ne mukàjèndè kàbìdi, bwalu, mukàjèndè ùvwà citùpà cyà mubidi wèndè sungasunga. Pashiishe kulwakù mwànà mupyamùpya, mwànà mulaya.

¹⁶⁸ Nzambi, Wêwè wàkalaya ne necìikalè cintu cìmwècìmwè aci mu ditùkù edi. Ndi ndòmba bwà Wêwè kushindika Dîyi edi. Nènku netùkwàcìlè mudimu ànu pa wówò mulayi ùmwèpelè awu, wà ne nebìikalè ànu mùvwàbì mu Sodomà amu, pabwìpì menemene ne Sodomà kwoshiibwayè ne cilumbulwidi kulengaci Sodomà, buloba bwà bàà Bisàmbà byà bendè. Pa nànkù cilumbulwidi cidi pabwìpì ne kutuuta bàà Bisàmbà byà bendè, nènku beena Yudà bàvwa ne bidimu bisàtù ne citùpà bikwàbò bwà kupicila mu cikondo cyà Dikènga dikolè, lutàtù lwà Yakòbò, ntùngùnukilu wa mbingu makumi mwandamutekète yà Danyèlè ayi. Kàdi, bàà Bisàmbà byà bendè mbabadiibwe, dîbà dyàkànyì dyà kuya. Ne Wêwè udi mufile cimanyinu aci, ne Wêwè wàkamba ne necìikalèku cyàkàbìdi. Enzàku nànkù, Nzambi. Bàdi, tudi mu byanza Byèbè, enzà neetù mùdi Wêwè mumòne ne mbikùmbànàngàne amu. Mu Dìnà dyà Yesù Kilistò. Amen.

169 Mpindyewu kanùbindulukikù to. Cìvwa cìfwànyine kwikala cinyi bu mèmè mwà kwikala mubindùlùke? Mpindyewu, ndi ngénza cintu mwab'ewu cyà ne bìvwa bìkèngela bwà kwikalabì bilààle ku budishikaminyi bwà Nzambì. Kàdi bwà cinyi ndi ngénza eci? Wàkamba ne cìvwa ne cyà kwikalakù. Acì's ncikòse bwalu. Nènku Yèyè ùDivwija cyòci aci, dishindìkùbwe mùshindù awu kumpàla kwènù, èè, kanwènakù mwà kuMwitabuuja anyi? Cyà bushùwà's. Ikàlà wèwè ànu ne diitabuuja mpindyewu ne itàbùùjà.

Ngǎnjì nkènzakanàku tǔng, mmonè kwàlombolà Nyumà Mwìmpè aku, cyènzàYe. Ncyèna mumanyè cyènzàYe to, aci ncimutàngile Yèyè. Kàdi bu wèwè ànu mwà kwikala ne diitabuuja, kwitàbùùjà ànu cyanààna ne: “Bintu byònsò bìdi mwà kwenzekela aba bàdi biitabuuja.” Nwènù bònsò nudi nwitabuuja nànkù anyi, elàayi byanza byènù muulu nwamba ne: “Ndi muCiitàbùùje bulelèlà.” [Disangisha dìdi dyamba ne: “Ndi muCiitàbùùje bulelèlà.”—Muf.] Ne mwoyi wànyì wònsò, ndi muCiitàbùùje.

170 Mpindyewu isàtù neikalè dishindika, bu Yèyè mwà kucyènzà misangu yisàtù buludi, bwà kunùjaadikila ne n'Cyà bushùwà. Nànsha wèwè usanganyiibwa penyi, nànsha mwikàle nganyi, ikàlà wèwè ànu ne diitabuuja ne itàbùùjà. Mpindyewu, kanwikadi—kanùtambakanyi eku ne eku to. *Elu* luseke.

171 Inǎbànza, udi usambila, ncyèna mukumanyè to. Sòmba wèwè ànu mwaba wùdi awu; kabyèna bikèngela bwà wèwè kulwa to. Ncyèna mukumanyè to, kàdi wèwè udi mwambule mwànà mukèsè wa bakǎjì mu cyanza, anyi pa cibelu cyèbè. Ndi mwenyi menemene kùdì. Kànà kàà bakǎjì katekète aku kàdi kàmwèka mwàkù ne kale, kadi kàmwèka kasàngàle. Nkànà kàà bakǎjì kakesè kalenga, kaansongaàkǎjì kakesè kàà nsukì mikunze. Ndi nkatàngila apa, kakeèna kàmwèka bu ne ncikalaba anyi ní ncinyi to. Ncyèna mumanyè ne ncinyi cidì cimutàcisha to. Kì ncifwànyine kwikala bwà mwànà awu to; ncifwànyine kwikala bwèbè wèwè. Kàdi mbyenzè ànu ne ndi nkumòna musòmbe mwaba awu ne mwànà awu, ùsambila. Bikèngela ngààkulèku neebè katanci kakesè, bwà kubàkulakù nyumà webè, mwàkambilà Yesù mukǎjì awu ne: “Ntwàdiléku màyi à kunwà,” nwamònu's, ànu bwà kudifwànyikijila—kudifwànyikijila muntu umwèpelè. Mwanèètù Bryant ne bakwàbò bàdi basòmbe apa aba, ndi mumanyè bantu bàdi basòmbe apa aba. Bàdi mwà kwikala pààbò mu lukèngelu, kàdi wèwè uvwa mwenyi.

172 Udi witabuuja ne mèmè ndi mupròfetà wa Nzambì anyi? Udi witabuuja ne bintu byùdi mutèèlèje dilòlò edi ebi m'Bulelèlà anyi? Mpindyewu, bu Nzambì mwà kunsokolwela cintu kampànda cyùdi mwenze, anyi cintu kampànda cyùvwà kùyì ne cyà kwikala mwenzè, anyi cintu kampànda cikutàcisha, anyi cidì dijinga dyèbè, neumanyè ne ncilelèlà anyi to. Kì

mmwômò anyi? Ne Yèyè mwenze nànkù, neàshìndikè Dìyì Dyèndè ne Yèyè ùdi umwèumwè awu makèèlèlè, leelù, too ne kashidi, ne Luuka Munsantu 17.30 awu ùdi munkaci mwà kumwèneshiibwa anyi? Nudi nuCìitabuuja anyi?

¹⁷³ Mpindyewu, inábànzà awu wèdì cyanza muulu ne katwèna bamanyàngàne. Ncyèna mukumanyè to, kàdi ndi nteeta bwà kupetangana ne nyumà wendè, muntu umwèpelè. Kùdi bààbùngì be bàà kunùdì bàdì bàkòka. Mpindyewu, udi witabuuja Eci ne mwoyi wèbè wònsò.

Mpindyewu, mbwà mwànà mukesè wa bakàjì awu. Kì nngwèwè to. Udi mubìndùlùke, kàdi kì ndibìnduluka dìdì dikutàcisha to. Cintu cinène pa mwoyi wèbè ncyà mwànà wa bakàjì mutekète awu. Ne udi witabuuja ne Nzambi ùdi mwà kungambila cìdici anyi? Udi ucìitabuuja anyi? Ncifwànyìnekù kukukwàcisha, udikù mufwànyìne kwitabuuja dìbà adi anyi? Mmpùtà wa mu bwongò. Ncyà bushùwà anyi? Mpindyewu tentèkèlà mwànà mukesè awu cyanza; cyanza cyèbè.

¹⁷⁴ Nzambi munanga, Wèwè wákamba ne: “Bimanyinu ebi nebifilè bàdì bìitabuuja. Nebàtentekelè babèèdì byanza, ne babèèdì nebàsangalè.” Mukàjì ewu mmwena kwitabuuja. Cyanza cyèndè cìdì pambidi pàà mwànà. Swákù bwà àsangalè. Mu Dìnà dyà Yesù Kìlistò, ndi ndambula disambila edi. Amen.

¹⁷⁵ Mpindyewu nudi nwitabuuja anyi, nwènù bònsò? Bu wèwè mwà kwitabuuja, bintu byònsò bidi mwà kwenzeka. Cyà bushùwà's!

¹⁷⁶ Ndi mumanyè inábànzà udi musòmbe pabwìpì nendè awu, kàdi yèyè mmutàngìle elu luseke ne meeji èndè ònsò matòòke. Ncyèna mwà kumuteela mu dìnà to, kàdi ndi... Bu mèmè mwà kumutàngìlaku ndambù, ndi mufwànyìne kumanya. Kàdi ndi mumanyè mpàla wa mukàjì ewu, kàdi ncyèna mumanyè cìdì lutàtù lwèbè to. Udi witabuuja ne ndi... Nzambi neàndekèlè mmanyè cìdì lutàtù lwèbè anyi? Udi mufwànyìne... Ncifwànyìne kukukwàcisha anyi? Disaamà dyà nsùkaadi. Mpindyewu, piikalàci cyà bushùwà, shààla mwelé cyanza cyèbè muulu. Ncyà bushùwà!

¹⁷⁷ Mbyenzèke ne inábànzà udi mulaadika... musòmbe ku luseke lwèbè awu, udi ne cintu cìmwècìmwè aci. Mmwenyi. Inábànzà mukwàbò awu ùdi ùsambidila muntu kampànda, mwànà wa cikalàbà. Udi witabuuja ne mwoyi wèbè wònsò anyi, Nzambi mmufwànyìne kucyènza.

¹⁷⁸ Muntu kampànda lwà paanyimà apa. Muntu mulùme musòmbe kuntu kwàka, ùteeta bwà kulekela dinwà dyà mfwankà. Udi witabuuja nè Nzambi neàbyùmùshè kùdì anyi? Eyo. Udi witabuuja anyi? Udi mwà kucipeta. Kacya ncitukù mwanji kumòna muntu awu to kacya bándela.

¹⁷⁹ Muntu mulùme nyèyè ewu. Ndi mmòna mundìdimbì mufiike mulembèlèle ku mutù kwà muntu ewu ànu mwab'ewu udi

mulààle pa kantu kenze bu kalààlu kàà kwambwila babèèdi, anyi nkwasà kampànda? Ûdi ùpùnga ne lufù. Mmubwikila kùdi mundìdimbì. Ûdi ne kànsèrè. Ncyèna mumanyè muntu awu to, kacya ncitukù mwanji kumumòna to. Nzambi mmumanyè byònsò bìdì bikutàngila. Aci's mbulelèlè, mukalenge. Udi witabuuja ne Nzambi mmufwànyine kungambila cintu kampànda cìdì cikutàngila anyi? Mbifwànyineku kukukwàcisha bwà wèwè kwakidila dyondopiibwa dyèbè anyi? [Mwanèètù wa balùme awu ùdi wàmba ne: "Èyo, ndi muswè."—Muf.] Ùwva mutwàdìibwe mwab'ewu kùdi mulundà kampànda. Kàdi wèwè kwèna wa muneemu to, udi wa ku mwaba kampànda mùdì mushiki munènè wà màyi mùdì bantu bàkwàta mishipa. Èyowà, mu Albany, mu Kentucky. Ncyà bushùwà. Itàbùùjà, nènku udi mwà kwalukila kumbèlu, musàngàle. Itàbùùjà ne kwàjiki. Bu wèwè mwà kuCìitabuuja! Udi ne cyà kuCìitabuuja, ne kwitabuuja ne ncikwenzèla. Udi witabuuja anyi?

¹⁸⁰ Wèwè, wa ku Tennessee, udi ne mwànà wa balùme udi ne disaamà dyà mfwènke. Kabiyi apa to, kàdi udi witabuuja ne yèyè neàsangalè anyi? Pashiishe angàtà mùshwàlà wèbè, wèbè. . . mu cyanza cyèbè amu, ùmutwàdilèwu. Yèyè neòndopiibwè bu wèwè mwà kuCìitabuuja.

¹⁸¹ Inàbànzà udi ùdila mwadi wàwa, musòmbe dyàmwàmwà dyà Docteur Vayle kwàka. Mmubwikila kùdi mundìdimbì, kàbìdì, mundìdimbì mufiike. Kacya ncitukù mwanji kumòna mukàjì ewu kacya bándela to, kàdi udi ne kànsèrè. Yèyè neáfwe cintu kampànda kaciyi cyenjibwe bwèndè yèyè to. Udi witabuuja ne Yèyè neàkwondòpè anyi, inàbànzà? Udi mwà kucyènza anyi? Udi mwà kupeta dyondopiibwa dyèbè, bu wèwè ànu mwà kwitabuuja.

¹⁸² Kùdi inàbànzà mutekète udi musòmbele ànu lwà paanyimà pèndè apu menemene ne mùshwàlà mubwikila pa mishikù yèndè. Ûdi kàbìdì ne byùjà byà mu cifù, ùsaama. Lungènyi lùdi lùkujimina, bikufomija, uuminyina. Muntu kampànda mmukufikishe mwab'ewu. Wèwè udi ne disaamà dyà bânà bakàjì. Bu wèwè mwà kwitabuuja, udi mwà kwalukila kwèbè kumbèlu, musàngàle.

¹⁸³ Wèwè, nsongàalùmè, udi mwenyi; udi musòmbe apa mene kumpalà kwànyì eku, muntàngile. Udi cinyi, mwena ku Porto Rico anyi cintu kampànda? Èyowà, címvwà njinga kwamba, cìndì nswa kwamba ncyà nè, mèmè ndi mwenyi kùdi. Udi mumanyè aci's; kwènà nànsha wa mu citùpà cyànyì cyà buloba to. Kàdi udi witabuuja ne Nzambi ùdi mwà kukupèèsha dijinga dyà mwoyi wèbè anyi? Mèmè mukwambile cìdì dijinga dyèbè, neudyakidilè anyi? Udi wenda ukèba dibàtiiza dyà Nyumà Mwîmpè. Aci's ncilelèlè. Akidilàaku Nyumà Mwîmpè, mwanèètù wa balùme.

¹⁸⁴ Muntu mulùme wa bafìke nyèyè ewu musòmbe lwà

paanyimà apa, mwikàle ne bujitu pa mwoyi wèndè. Mbwà mukàjèndè. Yèyè awu kèna nànsha mene, kaaba aka to. Ùdi ne lutàtù ne makàsà èndè. Udi witabuuja ne Yèyè neàmwondòpè anyi? Udi witabuuja anyi? Wèwè udi mwenyi mwab'ewu. Udi wa dyàmwàmwà dyà mbù. Udi wa ku Jamaïque. Udi witabuuja ne Nzambì ùdi mwà kungambila ne wèwè udi nganyi anyi? Mukalenge Brady. Udi witabuuja anyi? Yesù Kilistò ùdi umweumwe awu makèèlèlè, leelù, too ne kashidi.

¹⁸⁵ Inàbànzà udi musòmbe lwà mundekeelu menemene *emu* ewu, udi ku luseke lwà Mandamu Wright wàwa, ùdi ne bujitu pa mwoyi wèndè. Ùdi ùsambidila mwànà wa bakàji. Ùdi ùdìlongolola bwà dimupanda. Udi witabuuja ne mwoyi wèbè wònsò, bwèndè yèyè anyi? Yèyè kààkwikala dijinga ne dipandiibwa to bu wèwè mwà kumufikisha ku diCìitabuuja. Mèmè ncyèna mwà kwondopa to.

¹⁸⁶ Kule kwàka mu nzùbu wa dyamushila bânà, ndi mmòna Nyumà wa Mukalenge, Mwanjèlò, Bukènkè bwikale butentemuka mu nzùbu wa dyamushila bânà. Bùdi pa mutù pàà mukàji mutekète, nè yèyè ùdi ne lutàtù lwà nyumà lùdiye munkaci mwà kudikonkapù. Mbimwènèke ànu bu ne bìvwa bìkèngela bwà mèmè kwikala mumanyè mukàji awu, mu mùshindù kampànda anyi kansanga, mukàji mutekète. Ùdi kàbidi ne lutàtù lwà bânà bakàji. Èyowà. Dinà dyèndè m'Màndàmù West, wa ku Alabama, Màndàmù David West. Itàbùùjà; Nzambì neàkupèèshèci.

¹⁸⁷ “Nekwikale Bukènkè, ne mu ditùkù adi pìikalà Mwànà wa muntu munkaci mwà kubuuludiibwa.” Aci cyòci kaciyi Yesù Kilistò umweumwe awu makèèlèlè, leelù, too ne kashidi to, mèmè ncyèna mumanyè kantu nànsha kàmwè pa Cyòci aci to. Nudi nwitabuuja Aci anyi? Bintu byònsò bìdi mwà kwenzeka bwà aba bàdi biitabuuja.

¹⁸⁸ Nwènù bàdi ku bikòlokolo byà mu ditùnga dijimà mpindyewu, ne mu tabernacle ewu, mbanganyi bàà kunùdi bàdiku baswè kwela byanza muulu kwamba ne: “Ndi mwena kwitabuuja”? Mpindyewu, nwènù bàdi mu bitùpà byà ditùnga mwàmwa abu, muntu ne muntu ùdi ne byanza byela muulu, kaaba aka. Ne pambèlu pààpa, dyàmwàmwa dyàdya mwaba kampànda mu ditùnga dijimà emu, nudi ne byanza byènù byela muulu, kakùyi mpatà to. Mpindyewu bwitààyì kwisù, tentèkèlè ànu muntu udi pabwìpi neebè awu byanza. Mukwàte ku cyanza. Cìtentèke pa dikaaya dyèndè. Ndi ne byanza byànyì pa mishwàlà. Tàngilààyì nùmonè cikaadiku cyenzèke leelù ewu's! Tàngilààyì nùmonè cikaadi cyenzèke mpindyewu.

Ùbandila mpàla Wendè mujidila
 Ùbàlakana ne dinanga dyà Nzambì;
 Baabanyanganyi bàà ngàsà Wendè
 babèneshiibwe,

Bu mabwe à mushinga mukolè mu cifulu
Cyèndè cyà butumbi bwà kukenkesha.

Mpindyewu sambilaayi. Tùsambilàayi, myaba yònsò.

¹⁸⁹ Nzambì munanga, díbà dyàfikì. Eci cidi cyùmvwija cinyi? Nzambì munkaci mwà kukumbaja Díyì Dyèndè! Dikòkiibwa kaayi edi, Mukalenge? Nzambì munkaci mwà kukumbaja Díyì Dyèndè. Ncinyi cidi pambèlu apa mu ditunga dijimà, kupicila ku tèlèfone, pàdi nkàmà ne nkàmà yà bantu batentèkèlàngàne byanza muntu ne mukwèndè mu ditunga dijimà apa, kuumukila ku elu luseke too ne ku lukwàbò, kuumukila ku Nord too ne ku Sud, ku Esètè too ne ku Wesètè? Bantu mbòbò aba basòmbe kaaba aka bafùmìne ku matungà à ku baabèndè, àbúngì à ku matungà, Mu Mexique, mu Canada, nènku tudi batentèkèlàngàne byanza muntu ne mukwèndè. Nzambì munkaci mwà kukumbaja Díyì Dyèndè's!

¹⁹⁰ Mmunyi mùdì muntu mufwànyìne kwimana apa ku luseke lwà Nyumà Mwìmpè ne kubìikila muntu bu mwàkenzelàYe Simonà Peetèlò amu ne: “Dìnà dyèbè n’Simonà, udi mwànà wa Yona?”

“Ndà ùkangàtè bàyeebè kàdi ùlwe mwab’ewu.”

“Ncyèna ne bàyaanyi bwàlà.”

“Mu bulelèlà. Wèwè udi ne bàtaanu.”

¹⁹¹ Yèyè kwamba ne: “Ndi mumanyè ne Maasiyà ùlwalwa bwà kwenza cyòci eci, kàdi Wèwè udi Nganyi?”

Yèyè ne: “Mémè ki Yèyè awu.”

¹⁹² Ne Wèwè udi umweumwe awu makèlèlèlè, leelù, too ne kashidi. Ne Wèwè utu mulayè ne: “Byenzi bĩndì Mémè ngèza nenùbyènzè pèènù. Nenwènzè byàbúngì bipite ebi, bwalu Ndi nya ku Taatù.” “Nènku, mònayì, mu matùkù à ndekeelu Nènnùtùminè Eliyà, mupròfetà, ne yèyè neashintululè meeji à bantu, kwaluja myoyi yà bânà ku Dilongesha dyà bàpostòlò dyà Bible.” “Nè nekwikalè Bukènkè lwà ku ibaamulòòlò.”

¹⁹³ S’ki twètù aba, Nzambì munène wa mu Dyulu! Díbà ndyòdi edi’s! Byanza mbitentekela bantu.

¹⁹⁴ Sàtaanà, udi mucìmùnyìibwe. Udi mwena mashimi. Nènku, bu musadidi wa Nzambì, ne bu basadidi, tudi tutùma díyì mu Dìnà dyà Yesù Kilistò, bwà wèwè kutùmikila Díyì dyà Nzambì, ne kupàtuka mu bantu, bwalu bààkafùnda ne: “Mu Dìnà Dyànyì bòbò nebiipatè baadèmons.”

¹⁹⁵ Ne bantu bònsò bàdi mwà kwikala badishikàmìne. Enzàku nànkù, Nzambì Munanga. Wèwè udi Nzambì wa mu Dyulu wàkacimuna, ditùkù adi ne dikòkiibwa pa Mukùnà wa Kàlvariyo awu, mabèèdi wònsò ne màsaamà wònsò ne byenzi byònsò byà dyabulù. Wèwè udi Nzambì. Ne bantu mbwondòpiibwe

ku mibùndàbùndà Yèbè. Mbadishikàmìne. Mu Dìná dyà Yesù Kilistò. Amen.

¹⁹⁶ Nzambi, mùshwàlà wònsò wùdi wùsanganyibwa kaaba aka ewu, pàdi Nyumà wa Nzambi mwikàlepù apa, pàdi dilaabiibwa dyà Yesù Kilistò pa bantu apa, ne bimanyinu binènè byàkalayàYe abi bikàle munkaci mwà kukùmbana, ne buloba bùdi munkaci mwà kuzakala, dikanka dyà buloba didi munkaci mwà kwenzeka, bimanyinu binène byàkambàYe, ne Mufundu mùle, ne Bukênkè bwà dilòlò munkaci mwà kukenka. Ndi ntèeka mubidi wànyì pa mùshwàlà eyi, uleeja mpàla wa mubidi mujìmà wa beena kwitabuuja bàà ku Esètè, ku Wesètè, ku Nord, ne ku Sud; ne kwambila dyabùlù ne: “Mu Dìná dyà Yesù Kilistò, shìya mubèèdi yònsò ùdiwù mutèèkiibwe pambidi awu,” bwà buneemè ne butùmbì bwà Dìyì dyà Nzambi. Mu Dìná dyà Dìyì dyà Nzambi, Yesù Kilistò wa mu Nazàlèètà. Amen.

¹⁹⁷ Mpindyewu, ne lutùlù lwònsò, ne dimanya dyònsò, ne dicincika dyònsò dyà maalu, mu meji ènù majaaname, bu beena kwitabuuja, udi witabuuja mpindyewu ne witaba dyondopiibwa dyèbè dyà kùdi Nzambi wa Bukolè bwònsò, mu Dìná dyà Yesù Kilistò anyi? Pawikalà witabuuja, shààla mwelè byanza byèbè muulu. Bònsò bàdi pambèlù mu bitùpà byà malaba byà ditùnga, shààlaayi balamè byanza byènù muulu kuntwaku. Muntu yònsò mwab’ewu, bwà ku dyànyì dimòna, ùvwa ne byanza byela muulu; munda, pambèlù, bàdi beeyèmène ku madidiishi, mu biibi, mu cibambalu cyà kwamushila bânà, ne bònsò mu nyungulwilu mu myaba yònsò, bantu bàdi ne byanza byela muulu. Bòbò bàdi bàCiitaba. Sàtaanà mmucimùnyiiibwe’s! Mibùndàbùndà yà Yesù Kilistò yidi yikwondopa, ne Bwikadi bwà Yesù Kilistò bùdi bùjaadika bulelèlà bwà ne Yèyè ùdi ne mwoyi leelù ewu, mwikàle kashidi ne dikùmbanyina dyà kulama mulayi wònsò ùvwàYe mwenzè awu. Amen! Ndi muMwitàbùùje. Kàdi nwènù? [Disangisha didi dyàmba ne: “Amen.”—Muf.]

¹⁹⁸ Mpindyewu tùjuukilààyaaku kuulu. Mu Dìná dyà Mukalenge Yesù, twitaba byònsò bikaadi byenjiiibwe anyi byambiibwè, tudi baMunangè ne myoyi yetù yònsò. Tudi tuMwengeleka ne byònsò bidì munda mwètù. Mpindyewu panùdi nuya ku mbànzà yènù mishiiilèshiiilàngane kuumukila ku dilòlò edi, Nzambi àye neenù. Nzambi ànùpèeshèku Nyumà Mwimpè panwikalà kanùyì ne Nyumà Mwimpè to.

¹⁹⁹ Mulùme yònsò, mukàji yònsò, mwànà wa balùme, anyi wa bakàji, mwab’ewu, bàdi kabàyi babàtùjiiibwe mu Dìná dyà Yesù Kilistò to, kùdi bilàmbà, ciinà cyà màyi. Kanùlààdikiji bwà màalabà cinùdi mwà kwenza leelù ewu nànsha. Màalabà dībà ndifwànyine kwikala dimanè kupita. “Lutàtu lwà leelù, lwà ditùku dyònsò, ndudikùmbànyine.” Kùdi bambi biimàne, bindile, bilàmbà mbindile. Kakwèna pa kufinukila to. Udi mwindile anyi? Pawikalà mwindile, udi mwitàbùùje. Nànsha bàmba ne uvwa mubàtùjiiibwè mùshindù kaayi, bakumyamìne

mâyì, bakupòngòlwèlè màyi, ní ncinyi cyònsò cìdikù aci, cìdi ntùpàkànyì. Bukènkè bwáfiki. Lwàkù, itàbùùjà, ùbàtìijibwè.

²⁰⁰ Muntu yònsò udi kàyì ne Nyumà Mwímpè awu, swàkù bwà ùpetè Nyumà Mwímpè, yònsò wa kunùdi, mu bukolé bwà Nzambì mu kaabujimà ne dinanga didìYe mukulayè, bwà kukuvwija cifùkiibwà cipyacipyà munda Mwèndè. Nzambì àkubènèshè.

²⁰¹ Mpindyewu, too ne ku dyàlumingu dilwalwà mu dindà pa dìbà citèemà ne tusunsa makùmi àsàtù, twímbàayi kaamusambu kakesè katùvwà ne ciibidilu cyà kwimba kùkaadi bidimu aka aka ne:

Kanùpu mwoyi disambila dyà mu díkù to,
Yesù mmuswè kutwilanganamù neenù;
Yèyè neàngatè lutàtù ne lutàtù lwènù lwònsò,
Kanùpu mwoyi disambila dyà mu díkù to.

Tùwímbàayi bònsò cyàpàmwè mpindyewu.

Kanùpu mwoyi disambila dyà mu díkù to,
Yesù mmuswè kutwilanganamù neenù;
Yèyè neàngatè lutàtù ne lutàtù lwènù lwònsò,
Kaa, kanùpu mwoyi disambila dyà mu díkù to.

²⁰² Mpindyewu patùdi tuwimba cyàkàbìdì apa, labùlàngànà ku cyanza ne mwena lwendu udi ku luseke lwèbè awu, nwamònu's, patùdi tuwimba apa.

Kanùpu mwoyi disambila dyà mu díkù to,
Kaa, Yesù mmuswè kutwilanganamù neenù;
Yèyè neàngatè lutàtù ne lutàtù lwènù lwònsò,
Kaa, kanùpu mwoyi disambila dyà mu díkù to.

²⁰³ Kanwènaayikù baMunangè anyi?

Ndi muMunange, ndi muMunange
Bwalu Yèyè wàkannanga kumpàla
Nè wàkampetela lupàndu (Ke cìvwà
dikòkiibwa ncyòci aci.)
Pa Mukùnà wà Kàlvariyo.

Dikòkiibwa òmwèdimwè pa Mukùnà wà Sunset, Mukùnà wà Nebo, Mukùnà wà Sinàayi, malabula mashìlèshìlàngàne ònsò à ku nsongo yà mikùnà. Dìbà adi, èyo, tùwímbàayaaku mpindyewu.

Ndi muMunange, ndi muMunange
Bwalu Yèyè wàkannanga kumpàla
Nè wàkampetela . . . lupàndu
Ku mucì wà Kàlvariyo.

²⁰⁴ Bònsò bàdì baMunangè, ambàayi ne: "Amen." [Disangisha didi dyamba ne: "Amen."—Muf.] Bìikalè nànkù's! Mpindyewu elà wèwè ànu meeji cyanàànà bwà cìdìYe mwenzè bwèbè wèwè; ela meeji, bwà ne wèwè uwà mwà kwikala pambèlu


pàapa mu nzubu wa cinwinyi cyà maalà dilòòlò edi. Pàmwäpa uvwa mufwànyine kwikala mu lukitá bu múmvwà mufwànyine kwikalamù, bu kabùyì bwà luse lwà Nzambì. Yèyè wàkakwenzela cinyi? Kaa, mmunyi mutùdiku bafwànyine kubènga kuMunanga's? Cìdi muntu kanà yònsò wàmba kacyèna ne cìdici cìshintulula to, Yèyè ùdi kumpàla.

²⁰⁵ Tubwitaayi kwìsù, ne twinyikàayi mitù yètù patùdi tuMwimbilawù mpindyewu apa. Yèyè's ùtu munangè misambu, kwimba miyenga. TùMwimbilàayi wù mpindyewu.

Ndi muMunange, ndi muMunange
Bwalu Yèyè wàkannanga kumpàla
Nè wàkampetela lupàndu
Ku mucì wà Kàlvaryò.

²⁰⁶ Ne mitù yètù ne myoyi yètù miinyika mu Bwikadi Bwèndè, ne dyanyisha bwà bìdi mèsù ètù mamòne, bìdi macì ètù múmvwè, bìdi bifùndiibwe mu Dîyì dyà Nzambì, cìdi mulayi Wèndè mwikàle bwètù twètù leelù ewu eci. Nzambì ànùbènèshè.

²⁰⁷ Tudi ne m—mwenyi munkaci mwètù dilòòlò edi, mwanèètù wa balùme kampànda, Ned Iverson uvwa kale wàwa mwambi wa ba Presbytériens. Tatwèndè, bânà bààbò bàà balùme, mbambi bàà ba-Presbytériens. Yèyè, ndi ngumvwa ne, ùvwa mubàtijiibwe leelù ewu, cyàkàbìdì, mu Dìna dyà Yesù Kìlistò. Mmwambi, ne mmwambi mwìmpè. Nènku mpindyewu nèmmlòmbè, mùndì ngiitabuuja ne yèyè mmusadidi wa Nzambì, bwà kulòmba mabènesha à Nzambì pa disangisha edi panùdi nuya ku mbànzà yènù apu.

²⁰⁸ Mwanèètù wa balùme Iverson, lwàku kumpàla eku, patùcìdì ne mitù yètù miinyika mu disambila apa. Nzambì àkubènèshè, mwanèètù wa balùme. 

65-0725E Edi Ndikòkiibwa Kaayì Nùnkù Kù Mukùná?
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org